

詩
經
類
考

詩經類考卷之十六

明武塘沈萬鈞仲容采輯

禮考

禮

鄭序云禮者體也履也統之于心曰體踐而行之曰禮體之謂聖履之謂賢○六韜太公對文王云禮者理之粉澤○周官大宗伯以吉禮事邦國之鬼神示以凶禮哀邦國之憂以賓禮親邦國以軍禮同邦國以嘉禮親萬民○禮者陰陽之際也百事之會也所以尊天地備鬼神序上下正人道也

婚姻 姪媵

通典云燧皇氏始有夫婦之道

即人

伏羲氏制嫁娶

以儷皮爲禮五帝馭時娶妻必告父母夏氏親迎于

庭殷迎于堂周制限以女之歲定婚姻之時親迎于

戶

何休曰後代漸文而迎于戶示其親

六禮之儀始備○天子聘女納

徵加穀珪

鄭玄云結紼加于束帛賈公彥曰士以

上皆用玄纁束帛天子加以穀珪也

公羊說天子至庶人皆親迎左氏說王者至尊無敵體

之義不親迎鄭玄駁之曰文王親迎于渭則天子親

迎也天子雖尊其于后夫婦也夫婦無判禮同一

體所謂無敵豈施

此哉禮記哀公問曰冕而親迎

不亦重乎孔子對曰合二姓之好以繼先聖之後以爲天地宗廟社稷之主君何謂重焉此言繼先聖之後以爲天地之主非天子則誰乎是鄭以天子當親迎也杜元凱以爲天子不親迎按春秋祭公逆王后于紀傳曰禮也劉夏逆王后訛卿不行皆不譏王不親行明是天子不當親迎也文王之迎太姒身爲公子迎在殷代未可據此以爲天子之禮孔子之對哀公自論魯國之法魯以周公之後得郊祀上帝故以先聖天地爲言耳非說天子之禮○公羊說曰天子諸侯娶三國凡九女娶三國者廣異類也恐一國有

血脉相似俱無子也姪娣媵者不相妬嫉也年雖幼猶從適人者明人君無再娶之義也待年于父母之國未任答君子也古者女嫁則姪娣從謂之媵媵送女也名物䟽按媵有二種諸侯娶九女夫人及二媵俱有姪娣大夫士無二媵卽以姪娣爲媵大夫備姪娣曲禮大夫不名世臣姪娣喪大記大夫撫姪娣是也士不必備士昏禮雖無娣媵先是也鄭注士昏禮云娣尊姪卑考諸經傳並無以姑爲媵之文蓋姑尊非可從嫁爾雅謂先生爲姒是娣得爲媵矣○周禮媒氏職曰仲春之月會合男女鄭玄注曰仲春陰陽

交以成婚禮順天時也○董仲舒論曰聖人以男女陰陽其道同類天道向秋冬而陰氣結向春夏而陰氣去故曰霜降而逆女冰泮而殺止○周禮曰太宰伯以冠婚之禮親成男女媒氏掌萬民之判男女成名已上皆書年月日以名焉令男三十而娶女二十而嫁中春之月令會男女于是時也奔者不禁遂人以樂昏擾盱注曰判半也得偶爲合主合其半成夫婦也○白虎通曰天子諸侯一娶九女者何重國廣繼嗣也法地有九州承天之施無所不生一娶九女亦足承君之施九而無子百無益也○公羊傳曰女

在國稱女在途稱婦入國稱夫人○釋名曰婚昏時
成禮也姻女因媒也五禮皆用昕惟親迎用昏○爾
雅曰壻父母爲姻婦父母爲婚○方言曰自家而出
謂之嫁○禮記曰婚禮者將合二姓之好上以事宗
廟下以繼來世也故君子重之又曰嫁女之家三日
不息燭思相離也娶婦之家三日不舉樂思嗣親也
三日而廟見稱來婦也擇日而祭于禰成婦之義也
○又曰夫婚禮萬世之始也一與之齊終身不改故
夫死不嫁男女別然後父子親父子親然後義生義
生然後禮作禮作然後萬物安壻親御授綏親之也

鄭玄注曰陽偶而陰和期日宜由親迎問名及納采

或云古五禮皆用雁○儀禮云父送女命之曰戒之

敬之夙夜無違命母施衿結帨曰勉之敬之夙夜無

違宮事庶母及門內施鞶申之以父母之命命之曰

敬恭聽宗爾父母之言夙夜無愆視諸衿鞶宗子無

父母命之親皆沒已躬命之○穀梁傳曰女嫁父戒

之曰謹慎從爾舅之言母戒之曰謹慎從爾姑之言

諸母施鞶紳戒之曰謹慎從爾父母之言徐邈注曰

鞶佩囊也親結其褵傳曰褵婦人之褱禪香纓也○

禮曰女子許嫁而纓注繫纓示有從人之端○禮昏

義云婦執笄棗栗脯修以見謹案婦見舅姑之禮笄
竹器盛棗栗者也○禮記婚義曰共牢而食合卺而
醕所以合體同尊卑以親之案共牢是同一牲體合
卺是取一瓢斷而爲兩杯以酌酒醕飲酒也○儀禮
云四爵合卺鄭注云卺破匏也四爵兩卺凡六爲夫
婦各三醕一升曰爵○曲禮曰三十曰壯有室女子
許嫁纓男女非有行媒不相知名非受幣不交不親
故日月以告君齋戒以告鬼神爲酒食以召鄉黨僚
友以厚其別也○家語魯哀公問孔子曰男子十六
精通女子十四而化是則可以生民矣問禮三十而

言類
有室女二十而有夫豈不晚哉孔子曰夫禮言其極
亦不是過男子二十而冠有爲人父之端女子十五
許嫁有適人之道於此以往則自婚矣○郊特牲曰
婚禮不用樂幽隱之義也婚禮不賀人之序也大傳
云同姓雖百世而婚姻不通周道然也哀公問孔子
曰天地不合萬物不生大婚萬世之嗣也○羅願婚
問曰或問古嫁娶之年男必以三十女必以二十乎
曰然聖人爲男女之節弱而後冠非美其容也責之
成焉壯而後昏非足其欲也責之代焉男至於三十
則知慮周可以率人女至于二十則言容備可以事

人矣故取是年以爲之節也或曰家語之說以爲二十三十者期至于此而不可過耳曰不然古人之言固有大爲之期者若三十二十云者一定而不易之辭也夫少之時血氣未定此其當戒之時然而從之豈特傷生伐性而已將無以責其率人之智事人之道故記曰女子二十而嫁有故二十三年而嫁聖人知夫有故者人事之所不免寧引而伸之主于二十有三終不先之于二十之前者此有以知其爲一定之辭也使是制而猶可進退宜曰男二十以上而娶母過三十女十四以上而嫁母過二十豈不明哉曰

若然必以是年則物有不備時有不暇及也奈何曰
古者昏禮之費省矣幣止于緇帛五兩牲止于魚祭
而豚饋蓋常人之家累歲計之皆足以預辦也自秋
成之後至于冰未泮之前凡有五十日不爲無暇按
其年而爲之不難也曰然則聖人何爲十九而娶曰
夫三十而娶吾所論者禮之常親在者之所爲也若
孔子之娶則孤子當室者之事也且夫昏禮以代親
故重孤子雖未昏而固已代父矣室家不備則祭祀
有所缺又慮民生之不長則絕嗣亡世有不可悔所
以許其不待年而娶國君十五而生子亦爲是也曰

仲春之月令會男女於是時也奔者不禁則又安可
限以年曰此正欲其及是年爾夫嘉事常在秋荀子
曰霜降逆女冰泮殺止詩曰將子母怒秋以爲期又
曰士如歸妻迨冰未泮秋者歲之成農蚕之暇也故
自秋以往凡男女之至于是年者各爲之嫁娶至冰
泮之前而止聖人又懼夫民之不用令而使男女不
得時少緩而至來年則舉趾之後又不復可議故于
來年仲春之月司察男女之無夫家者官爲會之使
各從其所欲雖奔猶不禁蓋事迫而其年不及此者
固不許其奔使之從禮也曰若爾則不待其擇乎曰

古者方田同井嫁娶不出其里又多因其舊所以隆
母黨安豐殺且不干非耦也若諸侯之制周公魯公
娶于薛孝惠娶于商自威以下娶于齊一世娶焉則
再世因之古者夫之父婦之父皆謂之舅其母皆謂
之姑而兩姓謂之兄弟者蓋其尊者多已之外親而
其子多已之同儕故也此古之制也○名物疏按朱
傳宗鄭義以桃夭爲婚姻之候今俗人多用其說不
知毛鄭二義合之則兩得離之則兩偏也爲毛說者
以秋冬爲期孔子家語云霜降而婦功成嫁娶者行
焉冰泮而農桑起婚始殺于此又曰冬合男女秋班

時位孫卿韓嬰皆曰霜降逆女冰泮殺止董仲舒曰
聖人以男女陰陽其道同類天道向秋冬而陰氣結
向春夏而陰氣去故霜降而逆女冰泮而止殺與陰
俱近而陽遠也爲鄭說者以二月爲期夏小正曰二
月綏多女士綏安也冠子取婦之時也月令仲春祀
郊媒蓋玄鳥生乳之月以爲嫁娶之候天子重之而
祀焉白虎通曰嫁娶以春何也春天地始通陰陽交
接之時也凡此諸書皆二家證據未易評定得失然
鄭本據媒氏之文請卽以周禮正之媒氏云仲春令
會男女奔者不禁會男女之無夫家者蓋時至仲春

則農業已起婚期過晚故不禁奔者或無夫家則汲汲然伺而會之若正爲婚姻之時而復不禁奔則男女必多野合者矣豈禮也哉據荀卿云霜降逆女冰泮殺止其意謂九月至二月皆可婚也或曰然則朱傳以周南桃夭及女心傷悲殆及公子同歸倉庚于飛爲婚候又何耶予按孔晁云女心傷悲謂蚕事始起感事而出熠耀其羽喻嫁娶盛飾桃夭以喻女之少壯各自有說且仲春亦可婚何害爲感時咏事哉

喪

白虎通云人死謂之喪言其亡不可見也生者哀痛

之亦稱喪○釋名云人死氣絕曰死死漸也就漸消也士曰不祿大夫曰卒諸侯曰薨天子曰崩少壯而死曰夭未二十而死曰殤尸已在棺曰柩于西壁下塗之曰殯朔望祭曰殷奠所用殷衆也既葬還祭于殯官曰虞謂虞樂安神使還此也又祭曰卒哭止孝子無時之哭朝夕而已也又祭曰祔祔于祖廟也期而小祥又期而大祥間月而禫亦祭名也○周禮大宗伯以凶禮哀邦國之憂以喪禮哀死亡○王制云天子七日而殯諸侯五日而殯大夫士庶人三日而殯○左傳云天子七月而葬同軌畢至諸侯五月同

言糾舉夫
盟至大夫三月同位至士踰月外姻至○禮書云易
繫辭曰古之葬者厚衣之以薪葬之中野不封不樹
喪期無數後世漸文故爲冠經衰裳帶屨以飾之于
是有斬齊功總袒免之等三年朞九月七月三月之
別然後情文稱而恩義立矣

錫爵

禮記云祭有舁輝音輝胞翟闔寺者惠下之道也翟者
樂吏之賤者也○毛傳云見惠不過一散○永傳云
卽儀禮燕飲而獻工之禮○名物疏按鄭以公庭爲
宗廟故引舁翟朱不拘祭祀故引獻工舁翟在祭之

末惠以五升之散獻工之禮則鄉飲酒鄉射燕禮大射俱有之大略卒歌主人獻工一人拜不興受爵主人拜送爵鄉飲鄉射于阼階上燕禮大射于西階上薦脯醢使人相祭工飲不拜既爵授主人爵衆工則不拜受爵辨有脯醢不祭工不辭洗笙入主人獻之于西階上一人拜盡階不升堂受爵主人拜送爵階前坐祭立飲不拜既爵升授主人爵衆笙則不拜受爵坐祭立飲辨有脯醢不祭惟大射不獻笙略下樂也然合此二說推之此碩人非士復非府史何者若士則尸飲九已有散爵之獻若府史亦恐不在工歌

之列殆是樂正之下衆工禮云賤吏是也

灑掃

曲禮云凡爲長者糞之禮必加帚於箕上以袂拘音而退其塵不及長者以箕自鄉而極音之○少儀云

汜掃曰掃掃席前曰拊音拊席不以鬣執箕膺搗音

○管子云凡拊之道實水于盤攘臂袂及肘堂上則播洒室中握手執箕膺襟厥中有帚入戶而立其儀不忒執帚下箕倚于戶側凡拊之紀必由奧始俯仰磬折拊毋有徹拊前而退聚于戶內坐板排之以葉適已實帚于箕遂出棄之

獻羔

月令仲春天子乃鮮羔開冰先薦寢廟注鮮當爲獻
獻羔祭司寒也○左傳申豐云其藏冰也黑牡秬黍
以享司寒獻羔而啓之杜預云二月春分獻羔祭韭
開冰室服虔云司寒司陰之神玄冥也○國語冬無
愆陽夏無伏陰春無淒風秋無苦雨皆藏冰所致也
陽不過則冬不溫陰不伏則夏不寒春有寒風使人
慘悽秋有苦雨使人患害

朋酒斯饗

傳云饗者鄉人以狗大夫加以羔羊○名物疏按傳

所云饗者謂黨正因腊飲酒黨正職云國索鬼神而
祭祀以禮屬民而飲酒于序以正齒位一命齒于鄉
里再命齒于父族三命不齒鄉飲酒經云尊兩壺于
房戶之間有玄酒卽此詩云用酒也記云其牲狗卽
毛傳所據也鄉飲酒禮賓興賢能與黨正飲酒不同
毛據爲說者以州黨鄉之屬也其有鄉大夫來觀禮
或鄉之所居州黨鄉大夫親爲主人則殺羔羊以饗
之○箋云十月民事俱畢國君閒于政事而饗羣臣
○月令孟冬大飲烝注十月農功畢天子諸侯與羣
臣飲酒于太學以正齒位謂之大飲別之于他其禮

亡今天子以燕禮郡國以鄉飲酒禮代之燕謂有牲體爲俎也

燕

周禮大宗伯以饗燕之禮親四方之賓客掌客掌四方之賓客飲食之等數與其政治凡諸侯之禮上公三燕侯伯再燕子男一燕○皇氏云燕禮折俎有酒無飯有二種若燕同姓夜則飲之其于異姓讓之而止○賈公彥云饗烹大牢以飲賓獻依命數在廟行之燕者其牲狗一獻四舉旅降脫屣升坐無算爵以醉爲度行之在寢此謂朝賓若聘客則皆一饗其燕

與時賜無數又云燕有四等諸侯無事而燕一也卿大夫有王事之勞二也卿大夫有聘而來還與之燕三也四方聘客與之燕四也○國語云先王之燕禮體解節折而共飲食之于是乎有折俎加豆肅幣宴貨以示容令好○韓詩說云夫飲之禮不脫屨而卽序者謂之禮跣而上坐者謂宴能飲者飲之不能者已謂之饗齊顏色均衆寡謂之沈閉門不出者謂之洹君子可以宴可以肅不可以沈不可以洹○周禮小宰以口府之六聯合邦治二曰賓客之聯事大宗伯以賓親邦國又掌客王合諸侯而饗則具十二

牢具百物○孔子曰敬則用祭器注祭器簋銅之屬
有好事于賓客則用之謂享食也○左傳晉卻克如
楚聘且涖盟楚子享之卻至曰諸侯間于天子之事
則相朝也于是乎有燕饗之禮享以訓恭儉燕以示
慈惠恭儉以行禮而慈惠以布政政以禮成民是以
息百官承事朝而不夕此公侯之所以捍城其民也
○召武子曰王享有體薦燕有折俎公當享卿當燕
王室之禮也○傳曰虢公晉侯朝王王饗醴命之侑
注先行享禮次行燕飲也侑助也燕則命幣物所以
助歡敬也○名物疏按賓有數等大行人掌大賓之

禮及大客之儀以親諸侯大賓要服以內諸侯也大客謂其孤卿以此推之要服以外爲小賓時聘之大夫士及爲介來者皆小客矣朝覲宗遇會同諸侯之爲賓者也時聘殷頻諸侯之爲客者也賓客之聯事小宰合之燕饗之禮宗伯職之九儀之命爵行人辨而等之牢禮餼獻飲食之等數掌客逆之逆于疆聚橈同析致積將弊前驅至朝詔位之類掌訝掌之野之委積司徒今修之若公侯伯子男之相爲賓公侯伯子男之臣相爲客其儀掌之司儀凡諸侯聘禮主國所以待賓者饗食君親爲主尊賓也燕私樂之禮崇

恩殺敬故聘禮曰燕則上介爲賓賓爲苟敬宰夫獻也若諸侯無事卿大夫有勤勞之功與羣臣燕飲以樂之則于客內立一人爲賓餘爲衆賓記云燕朝服于寢若與四方之賓燕則公迎之大門內揖讓升與卿燕則大夫爲賓與大夫燕亦大夫爲賓燕義云使宰夫爲獻主臣莫敢與君抗禮也不以公卿爲賓而以大夫爲賓爲疑也然則燕四方之賓與國內之臣其禮惟迎不迎之異若族燕之禮則文王世子云異姓爲賓膳宰爲主人不以同姓爲賓者親親也不親主獻者尊君也士冠禮之賓主人之僚友也鄉飲酒

禮諸侯之卿大夫三年大比獻賢者能者于其君以
禮賓之與之飲酒主人就先生而謀賓介注云賢者
爲賓其次爲介其次爲衆賓以禮賓之將獻于王與
鄉飲之賓及衆賓皆鄉人之無爵者也鄉飲酒義云
立賓以象天立主以象地設介僕以象日月立三賓
以象三光坐賓于西北必南鄉鄭以鄉飲酒義之篇
具載四禮則鄉飲酒四事其儀皆同也諸侯大射之
禮士大夫爲賓宰夫爲主特性少牢士虞禮之賓皆
助祭執事者也楚茨爲賓爲客賓筵賓載手仇是天
子助祭之臣亦稱賓也祭禮又有內賓鄭玄云姑妹

妹也其羣下自相飲亦尊一人爲上賓左傳季氏飲大夫酒臧紇爲客國語公父文伯飲南宮敬叔酒露睹父爲客是也鹿鳴之詩燕羣臣嘉賓則賓指四方之賓及羣臣也○鹿鳴承筐是將箋云飲之而有幣酬幣也食之而有幣侑幣也○禮書云食有侑食故有侑幣饗有鬯爵故有鬯幣儀禮公食大夫侑以束帛而庭實以皮大夫相食以束帛此食有侑幣也聘禮公于賓若不親食使大夫致之以侑幣致饗以鬯幣亦如之大夫于賓若不親饗則公作大夫致之以鬯幣士昏禮舅姑享送者鬯以束錦此饗有鬯幣也

燕禮無用幣之文鹿鳴燕羣臣嘉賓序曰旣飲食之
又實幣帛筐篚則所謂飲食者燕與食耳此燕有鬯
幣也孔穎達以飲食爲饗食非詩意也春秋傳曰鬯
幣宴貨以示容合好則燕未嘗不用鬯幣特文不備
禮器曰琥璜爵鄭氏以爲天子鬯諸侯諸侯相鬯之
禮是天子饗諸侯諸侯相饗鬯幣用玉鬯幣亦謂之
侑侑幣不謂之鬯故春秋傳享醴皆曰侑以侑者勸
鬯之通稱也

飫

毛云飫私也不脫屨升堂謂之飫鄭云私者圖非常

之事若議大疑于堂則有飫禮疏云飫不在公朝在
路門內酒肉在堂○什言云飫私孫炎曰飫非公朝
私飫飲酒也○國語定王曰王公立飫則有房烝將
以講事成章建大德昭大物也故立成禮烝而已飫
以顯物宴以食好歲飫不倦時宴不淫衛彪溪曰武
王克商作詩以爲飫歌名之曰支以貽後之人使永
鑒焉○名物疏云按皇氏注禮記以飫爲享禮義異
于毛若依韋昭國語注則毛說爲長但韋依毛鄭爲
文未必外傳之本旨

陳饋

箋云陳其黍稷謂爲食禮○皇氏注禮記云食禮者有飯有殽雖設酒而不飲其禮以飯爲主故曰食也其禮有二種一是禮食故大行人云諸侯三食之禮有九舉及公食大夫禮之屬是也二是燕食者謂臣下自與賓客旦夕共食是也按鄭注曲禮酒漿處右云此大夫士與賓客燕食之禮○周禮大宗伯以飲食之禮親宗族兄弟大行人上公食禮九舉侯伯食禮七舉子男食禮五舉掌客上公三食若弗酌則以幣致之侯伯再食子男一食○聘禮公于賓一食上介一食若不親食使大夫各以其爵朝服致之以侑

幣大夫于賓一食上介若食若饗○禮記云族食世降一等注云親者稠䟽者稀又云凡養老殷人以食禮○埤雅云饗具四豆四邊之實食禮則自饋食而下無朝事之豆邊也燕禮則自加豆加邊而下無饋食之豆邊也

吉

王介甫云吉言諏日擇士之善○周禮太宰祀五帝前期十日帥執事而卜日祀大神示享先王亦如之○射義云天子將祭必先習射于澤澤者所以擇士也已射于澤而後射于射宮射中者得與于祭不中

者不得與于祭○劉氏云諏日者君臣諏謀祭日于旬有一日之先至次日乃卜所諏之日吉否如少牢饋食大夫先與有司諏丁巳之日至明日乃筮其日之吉凶也擇士者大射于射宮以選與祭之士

蠲

王氏曰蠲言齋戒滌濯之潔○禮記云散齋七日以定之致齋三日以齊之定之謂齊齊者精明之至也然後可以交于神明也又云七日戒三日齋疏云七日戒者謂散齋也三日齋者謂致齋也○周禮冢宰祀五帝祀大神示享先王及執事眡滌濯注執事初

爲祭事前祭日之夕滌濯謂溉祭器及甒甒之屬疏
儀禮特牲亦云前祭日之夕視壺濯及豆籩士卑得
與人君同少牢大夫禮當祭日溉祭器者下人君也
案少牢饗人概鼎七俎廩人概甒甒司空概豆籩及
勺爵此注不言七俎豆籩勺爵者之屬中含之又云
宰夫祭祀從太牢而眡滌濯宗伯凡祀大神享大鬼
祭大示帥執事而卜日宿眡滌濯小宗伯大祭祀眡
滌濯肆師祭祀視滌濯

禴祠蒸嘗

爾雅云春祭曰祠夏祭曰禴秋祭曰嘗冬祭曰烝郭

璞曰祠之言食也。禘新菜可汙嘗嘗新穀。烝進品物。
○周禮云以祠春享先王以禴夏享先王以嘗秋享
先王以烝冬享先王。司尊彝祠禴裸用雞。彝鳥彝朝
踐用兩獻尊。再獻用兩象尊。嘗烝裸用尊。彝黃彝朝
獻用兩著尊。饋獻用大壺尊。○王制云天子諸侯宗
廟之祭春曰禘夏曰禘秋曰嘗冬曰烝。天子禘祫
禘祫嘗祫烝諸侯祫則不禘禘則不嘗嘗則不烝烝
則不祫諸侯祫禘禘一禘一祫嘗祫烝祫注云周改
夏祭曰祫以禘爲陰祭虞夏之制諸侯歲朝廢一時
祭郊特牲云享禘有樂而食常無樂陰陽之義也。注

云禘當爲禴字之誤記又云禘者陽之盛也嘗者陰之盛也古者於禘祭賜服順陽義也于嘗出田邑發秋政順陰義也○孔氏云自殷而上禴禘嘗烝至周公去夏禘之名以春禴當之更名春日祠

夜飲

箋云夜飲之禮在宗室同姓諸侯則成之庶姓讓之則止○燕禮無算爵無算樂宵則庶子執燭于阼階上司官執燭于西階上甸人執大燭于庭閭人爲大燭于門外賓醉奏陔遂出

饗

言類卷二 禮記卷二
周禮大行人云上公饗禮九獻侯伯七獻子男五獻
大國之孤視小國之君掌客云上公三饗侯伯二饗
子男一饗○聘禮云公于賓再饗賓介皆明日拜于
朝上介一饗大夫于賓一饗上介若食若饗○禮記
云凡養老有虞氏以燕禮夏后氏以饗禮殷人以食
禮周人修而兼用之○仲尼燕居云禮有九焉大饗
有四焉兩君相見揖讓而入門入門而縣興揖讓而
升堂升堂而樂闋下管象舞夏籥序興陳其薦俎序
其禮樂備其百官行中規還中矩和鸞中采齊客出
以雍徹以振羽○左傳云饗有體薦燕有折俎公當

饗卿當燕王室之禮也又云享以訓恭儉燕以示慈惠○皇氏禮記注云饗有四種一是諸侯來朝天子饗之其牲則體薦體薦則房烝國語云王公立飫則有房烝其所云飫卽謂饗也其禮亦有飯食故春人云凡饗食共其食米則饗禮兼燕與食也二是王親戚及諸侯之臣來聘王饗之禮亦有飯食及酒其酌數亦當依命其牲折俎亦曰殽烝三是戎狄之君使來王委饗之四是享宿衛及耆老孤子則以醉爲度○儀禮疏云受賓聘享則于太廟饗食則于禰廟燕又在寢彌相親也周禮疏云饗禮九獻者謂後日王

言系類二
速賓賓來就廟中行饗享者烹太牢以飲賓設几而不倚爵盈而不飲九獻者王酌獻賓賓酢主人主人酌賓酬後更八獻是爲九獻

右

傳云右勸也疏云謂設享禮勸其功○箋云右之者主人獻之賓受爵奠于薦右旣祭俎乃席末坐卒爵之謂也○詩緝云右與侑宥通皆助也莊十八年左傳云王饗禮命之宥注以幣物助歡也僖二十五年二十八年皆云饗醴命宥是饗禮必有賜以爲宥而彤弓則宥之大者也

醕

傳云醕報也疏云爲享以報功○箋云主人獻賓賓
酢主人主人又飲而酌賓謂之鬯○孔氏云酬有二
等旣酢而鬯賓者賓奠之不舉謂之奠鬯至三爵之
後廼舉向者所奠之爵以行之于後交錯相酬名曰
旅酬謂衆相酬也○名物疏按嚴坦叔云鄭以酬爲
獻醕但酬酢是燕禮饗訓其儉爵盈不飲未必有酬
酢此考之不詳也周禮掌客享有九獻七獻五獻之
節郊特牲云大饗君三重席而酢三獻之介君專席
而酢但其禮之儉不若燕之四舉旅耳安得謂無酬

酢耶

會

儀禮云諸侯覲于天子爲官方三百步四門壇十有二尋深四尺加方明于其上注此謂時會殷同也爲宮者于國外王巡狩至方嶽諸侯會之亦爲此宮以見之又云公侯伯子男皆就其旂而立四傳擯天子出拜日于東門之外反祀方明禮日于南門外禮月與四瀆于北門外禮山川丘陵于西門外祭天燔柴祭山丘陵升祭川沈祭地瘞○周禮大宗伯以賓禮親邦國時見曰會注云時見者言無常期諸侯有不

順服者王將有征討之事則既朝覲王爲壇于國外
合諸侯而命事焉春秋傳曰有事而會不協而盟是
也大司馬大會同帥士庶子而掌其政令小司馬凡
小會同掌其事大行人時會以發四方之禁注云禁
謂九伐之法司儀將合諸侯則令爲壇三成官旁一
門詔王儀南鄉見諸侯王揖庶姓時揖異姓天揖同
姓○少儀云會同主詔○晉叔向云明王之制歲聘
以制業間朝以講禮再朝而會以示威再會而盟以
顯昭明

同

周禮大宗伯云殷見曰同注殷猶衆也十二歲王如
不巡狩則六服盡朝朝禮旣畢王亦爲壇合諸侯以
命政焉所命之政如王巡狩殷見四方四時分來終
歲則徧大行人云殷同以施天下之政注政謂邦國
之九法○名物疏按毛傳時見曰會殷見曰同此釋
文則然耳其實會諸侯于東都非必有征討又非十
二年之事意者會諸侯之時亦曾爲壇于國外如覲
禮所云與然會者交會同者同聚則諸侯見天子或
並得稱之耳

射

禮記射之爲言繹也或曰舍也繹者各繹已之志也
故心平體正持弓審固則射中矣○山堂考索云射
肇于黃帝世本云揮作弓夷牟作矢見于繫詞易云
弧矢之利以威天下虞書云侯以明之是射見于堯
舜之時夏商無文至周弓之別有六矢之割別有八
侯之別有三又有五射之文而射禮具矣天子所以
親射何助陽氣達萬物也春風微弱恐物有窒塞不
能自達者夫射自內發外貫堅入剛象物之生故以
射達之也天子射熊示服猛巧佞也熊爲獸猛巧者
非但當服猛也示當服天下巧佞之臣也諸侯射麋

者示達迷惑人也麋之言迷也大夫射虎豹者示服
猛也士射鹿豕者示除害也各取德所能服也大夫
士兩射者示人臣爲君親視事身勞苦也或曰臣陰
故數偶也侯以布爲之用人事之始也所以名爲侯
明諸侯有不朝者則射之故射禮祝曰嗟爾不寧侯
爾不朝于王所以故天下失業亢而射耳所以不射
正身君子重同類不忍射之故畫獸而射之射于堂
上示從上制下也禮曰賓主執弓請升射于兩楹之
間天子射百二十步諸侯九十步大夫七十步士五
十步明尊者所服遠也卑者所服近也○白虎通將

祭擇士先射于澤宮後射于射宮大射射于射宮將祭擇士之射也賓射射于朝諸侯來朝之射也燕射射于寢賓客相飲之射也○安城劉氏曰凡侯有中
有身有上下舌獸侯以布爲之天子與諸侯皆用布九幅每幅濶二尺高一丈八尺九幅之布廣一丈八尺最中一幅卽所謂中也中之上下各二幅連中幅高一丈所謂身也身之上下又各二幅以爲舌據侯中之廣一丈八尺以三分之一爲正則正鵠當廣六尺○王氏曰射之制有三有大射有賓射燕射張布侯則設鵠以皮綴于侯中央用以大射司裘所謂王

大射則共虎侯熊侯豹侯諸侯則共熊侯豹侯卿大夫則共麋侯皆設其鵠也方大射張皮侯而擇士助祭取其有中的之功而用之蓋諸侯于春而貢士射中多則與祭其君爲有功而益以地射中少則不得與祭則其君有罰而削以地五采侯則績以采色用以賓射卽射人所謂王六耦以射三侯五正五正以五采飾正是也五采之侯則賓射之禮所以待諸侯之朝覲五采象文德也獸侯則蒙以獸用以燕射卽鄉射禮所謂天子熊侯白質諸侯麋侯赤質大夫布侯畫以虎豹士布侯畫以鹿豕言能爲民除害天下

之害去然後可以休息而安燕故王以燕息也○周
禮梓人爲侯廣與崇方參分其廣而鵠居一馬上兩
介與其身三下兩介半之上綱與下綱出舌尋緘寸
馬張布而棲鵠則翫以功注崇高也參分器以波爲
之各以其侯居中參分之一也兩介謂布可以維持
侯者上幹下幹皆謂舌或謂舌取其舌而左右也侯
制上廣下狹蓋取象于人張臂八尺長六尺也綱所
以繫侯于植者上下皆出舌一尋尋一人張臂之節
綱謂緘緘籠綱舌維持侯○東陽許氏曰射有三士
無大射而有賓射燕射也天子三侯虎熊豹諸侯二

熊豹大夫麋士豸凡侯用布形必方大射之侯外一
分以其名之皮飾之虎侯用虎皮熊侯用熊皮其中
三分之一又用其皮綴于中爲的故曰棲皮爲鵠賓
射之侯外亦用皮飾其中三分之一則用采色畫謂
之正天子五正內朱次白蒼黃玄諸侯三正朱白蒼
大夫二正朱綠燕射之侯外亦用皮飾其中三分之
一天子則白質而畫其獸頭諸侯丹質大夫士則上
就布上畫之故曰畫布爲正凡此侯道虎九十弓能
七十弓豹麋五十弓鄭司農云九十尺曰侯四尺曰
鵠二尺曰正四寸曰質

正鵠皆鳥之捷者用虎豹
辨魯問各題肩爲正

熊之皮示服猛也中鵠示發微也王以六耦射三侯
三獲三容樂以騶虞九節九十五正諸侯以下各殺
鄭司農云容者乏也待獲者之所蔽也大射禮唱獲
者居乏中中則舉旌以宮下旌以商鄉射曰司馬命
獲者執旌以負侯九節析羽九重設于長杠○保氏
教六藝三曰五射注白矢參連剡注襄讓音尺井儀也
疏曰矢矢貫侯過見其鏃白參連前放一矢後三矢
連續而去剡注羽頭高鏃低而去剡剡然也襄尺臣
與君射不與君並立讓君一尺而退也井儀四矢貫
侯如井之容儀又車僕大射共三乏司射凡射共獲

旌射人以射法治射儀諸子秋合諸射以考其藝而
進退之大僕王射贊王弓矢繕人掌詔王射○射義
疏凡天子諸侯及卿大夫禮射有三三者之外又有
鄉射謂卿大夫貢賢能之後行鄉射之禮而詢衆庶
又有州長射于州序之禮其侯並同賓射之法鄭注
云鄉侯二正又有主皮之射二一是卿大夫從君田
獵班餘獲而射凡祭取餘獲陳于澤卿大夫相與射
鄭注鄉射稱主皮者無侯張獸皮而射之主于獲也
二是庶人亦主皮鄭注周禮庶人無侯張皮而射之
是也又有習武之射司弓矢云弧弓以授射甲革槌

質是也○周禮鄉大夫以鄉射之禮五物詢衆庶疏
州長春秋二時習射于序名鄉射物事也一曰和二
曰容三曰主皮四曰和容五曰興舞易氏曰射之物
有五而其節有三曰和曰容見于未射之時主皮和
容見于射侯之際興舞見于既射之後此射之序也
內志正而節比樂曰和外體直而容比禮曰容中鵠
主皮也禮樂交作和容也發揚蹈厲興舞也州行州
射之禮鄉行鄉射之禮及三年而賓興○鄉射記惟
君射于國中餘則否鄉射在城外衆庶皆觀焉故得
詢五物天子諸侯射先行燕禮鄉大夫士射先行鄉

飲禮孔子爲鄉大夫鄉射之禮先行鄉飲禮子路爲司射故射矍相之圃使子路出誓此詢是三物之內三物其事十有八今六德之中惟問和六行之中惟問容六藝之中惟問禮樂射貢賢于王餘未能備略舉五者問之○孔子曰士使之射不能則辭以疾懸弧之義也○司弓矢常矢庫矢用諸散射注謂禮射及習射也○祭侯之禮以酒脯醢其辭曰惟若寧侯母或若汝不寧侯不屬于王所故抗而射女○射人祭侯則爲位注祭侯獻服不服不以祭侯爲位爲服不受獻之位也大射曰服不侯西北三步北面拜受

爵䟽大射禮使服不氏負侯將祭之時先設位于侯

西北北面○鄉射記君國中射則皮中以翽旌獲白

羽朱羽糒

謂燕射也

于郊則間中以旌獲

王制大

于境則

虎中龍旌

謂與鄰國君射也

大夫兕中各以物獲士鹿中翽

旌以獲

謂小國之州長也

惟君有射于國中其餘否○吳越

春秋陳音云古者人民死則暴以白茅投于中野孝

子不忍見父母爲禽獸所食作殯以守之於是神農

黃帝弦木爲弧剡木爲矢黃帝之後楚有弧父所射

無脫以其道傳羿羿傳逢蒙逢蒙傳于楚琴氏○列

女傳工人妻云妾聞射之道左手如拒右手如附支

特經類考

禮考卷十六

七

七

右手發左手

御

周禮保氏教六藝四曰五馭鄭司農云五馭鳴和鸞
逐水曲過君表舞交衢逐禽左○王制凡執技論力
贏股肱決射御月令孟冬命將帥習射御內則成童
學射御○列子造父之師曰泰豆氏告造父曰推于
御也齊輯乎轡銜之際急緩乎唇吻之和正度乎胸
臆之中執節乎掌握之間內得于中心外合于馬志
是故能進退履繩而旋曲中規取道致遠而氣力有
餘○呂覽云寒衰作御

祭馬祖

夏官校人云春祭馬祖夏祭先牧秋祭馬社冬祭馬步注云馬祖天駟先牧始養馬者馬社始乘馬者馬步神爲災害馬者○爾雅曰旣伯旣禱馬祭也注伯祭馬祖也將用馬力必先祭其先疏夏官馭夫春祭馬祖馬祖祭之在春其常也而將用馬力又將用彼禮以禱之○說文云禱告事求福也禱音禱禱牲馬祭也詩曰旣禱旣禱○周禮庾人祭馬祖祭閑之先牧甸祝禱牲禱馬皆掌其祝號杜子春云禱禱也爲馬禱無疾爲田禱多獲會牲

朝

曲禮曰天子當衣而立諸侯北面而見天子曰覲天子當寧而立諸公東面諸侯西面曰朝注云諸侯春見曰朝受贄于朝受享于廟生氣文也秋見曰覲一受之于廟殺氣質也朝者位于內朝而序進覲者位于廟門外而序入王南面立于衣寧而受焉夏宗依春冬遇依秋王制云諸侯之于天子比年一小聘三年一大聘五年一朝又云天子無事與諸侯相見曰朝考禮正刑一德以尊于天子○周禮太宰大朝覲會同贊玉幣玉獻玉凡玉爵宰夫凡朝覲會同以牢

禮之法掌其牢禮幕人朝覲會同共幃幕握帟綬掌
次朝覲會同張大次小次大宗伯春見曰朝注云朝
朝也欲其來之早又云朝覲會同則爲上相司几筵
大朝覲王位設黼宸筵席玉几典瑞云侯伯執圭子
男執璧以朝覲宗遇會同于王小臣朝覲沃王盥齊
僕朝覲宗遇饗食皆乘金路各以其等爲車送逆之
節大司寇朝覲會同前王大人春朝諸侯以圖天
下之事凡諸侯之邦交歲相朝也○周禮曰春朝諸
侯而圖天下之事秋覲以比邦國之功夏宗以陳天
下之謀冬遇以協諸侯之慮時會以發四方之禁殷

同以施天下之政○左傳曰凡朝以正班爵之義會以訓上下之則

宗

大宗伯云夏見曰宗注云尊也欲其尊王

詛

周禮司盟掌盟載之法盟萬民之犯命者詛其不信者有獄訟者則使之盟詛各以其地域之衆庶共其牲而致焉詛祝掌盟詛之祝號作盟詛之載辭以叙國之信用以質邦國之劑信○毛氏云詛君以豕臣以犬民以雞○韓詩云盟牲所用天子諸侯以牛豕

大夫以犬庶人以雞○鄭氏曰大事曰盟小事曰詛
賈公彥曰盟者盟將來詛者詛往過○左傳注云詛
以禍福之言相要○陳祥道曰盟有繼之以詛詛有
不繫于盟大事必盟而或詛詛以詛往過而或爲將
來盟詛皆坎牲加書以告神明其異者盟有執耳軟
衆旣盟有祈而詛無是也

享祀妥侑

疏云享祀雖總于祭因在前則爲灌及朝踐○郊特
牲云周人尚臭旣灌然後迎牲詔祝于室坐尸于堂
注云謂朝事時也○禮書云尸入旣裸于室然後延

之于戶西坐于主東南面行朝踐之禮是時君出迎
牲蕭載腍脰合黍稷燂于鑪然後詔以羹定焉其禮
亦謂之朝事又謂之朝獻以象朝時之所養也○妥
䟽云當饋食之節○郊特牲云舉角詔妥尸注云
妥安坐也尸始入舉奠筯若奠角將祭之祝則詔主
人拜安尸使之坐尸卽至尊之坐或時目不安時則
以拜安之○少牢禮云尸卽席坐主人拜妥尸卽奠
○賈公彥云天子諸侯大天士雖同名饋食仍有小
別何者天子諸侯食前仍有饋獻一是饋孰陰厭陽
厭尸入室乃獻大夫士則饋孰與黍稷爲陰厭陽厭

前無饋獻以此爲異耳○禮書云羹定詔于堂然後
延主于奧尸坐其北主人拜妥尸而奠爵舉焉俎則
載合亨之孰而簋簋之黍稷進焉又云周官掌次祭
祀張尸次于廟門之西及其入也主人立于阼階東
西南面尸盥而進升自西階主人升自阼階祝從尸
主人從祝尸入卽席東面而坐祝主人西南而立皆
拜妥尸尸荅拜遂坐而授祭○侑特牲禮云尸三飯
告飽祝侑之如初○少牢禮云尸三飯又食食載又
食舉腊肩又食舉牢幣又食告飽祝侑曰皇尸未實
侑尸又食舉牢肩尸不飯主人不言拜侑尸又三飯

言系類考
○太祝云辨九擗以享右祭祀注云右讀爲侑勸尸食而拜又云逆尸令鐘鼓右亦如之○鄭氏云食大名小數曰飯士九飯大夫十一飯其餘有十三飯十五飯賈公彥云一口謂之一飯士三飯卽告飽而侑大夫七飯告飽而侑諸侯九飯而侑天子十一飯而侑

絜牛羊 剝亨肆將

疏云鮮絜爾王者所祀之牛羊于周禮司徒奉牛司馬奉羊○劉執中云絜者在滌而芻之也○郊特牲云帝牛必在滌三月稷牛惟具○周禮充人掌絜祭

祀之牲牷祀五帝則繫于牢芻之三月享先王亦如之○名物疏按絜字古屑奚結二音潔字古通作絜故孔疏云鮮潔所祀之牛羊也○剝鄭云有解剝其皮者○禮運曰腥其俎孰其殽注云腥謂豚解而腥之孰謂體解而爛之孔氏云豚解腥之是解剝其肉體解爛之是煮熟之者陳祥道云國語曰郊禘之事則有全胥王公立飫有房胥親戚燕飲有殽胥全胥豚解也房胥體解也殽胥骨折也士喪禮特豚四髻托歷反去蹄兩肱脊既夕鼎實羊左肱亦如之然則四髻者殊左右肩髀而爲四又兩肱一脊而爲七此所

謂豚解也士喪禮略豚解而已至虞然後豚解體解兼有焉若夫正祭則天子諸侯有豚解體解大夫有體解無豚解以其無朝踐獻腥之禮故也○周禮內饔凡宗廟之祭祀掌割烹之事司士凡祭祀帥其屬而割牲○亨周禮內饔掌王及后世子膳羞之割烹煎和之事凡宗廟之祭祀掌割烹之事外饔掌外祭祀之割烹共其脯修刑臠陳其鼎俎實之牲體魚腊凡賓客之饗飧饗食之事亦如之邦饗耆老孤子士庶子掌割烹之事亨人掌共鼎鑊以給水火之齊職外內饔之爨亨煮辨膳羞之物祭祀共太羹鉶羹賓

客亦如之○肆傳云陳也或陳于牙䟽地官牛人云
凡祭祀共其牛牲之牙注云牙若今屠家肉架則肆
謂既殺乃陳之于牙上也箋云有肆其骨體于俎者
釋文肆他歷反○禮運云然後退而合亨體其犬豕牛
羊注云謂分別骨體之貴賤以爲衆俎也○禮書云
周禮王之牲事冢宰太僕贊之五官共奉之內饗外
饗割亨之司士帥其屬而割羞諸子正其牲體肱骨
三肩臂臠也臠奴到反股骨三肫腧音穀也脊骨三正脊
脰脊橫脊也脅骨三代脅長脅脰脅也正脊之前則
臠也臠音益肫之上則髀也然則左右肱之肩臂臠與

左右股之肫脇穀而爲十有二春骨三與左右脅骨
六而爲九二穀正祭不薦于神尸主人之俎兩髀不
升于主人主婦之俎膾不升于吉祭之俎則祭之所
用者去髀膾而二十有一去二穀而爲十九矣祭統
曰商人貴髀周人貴肩以周人之禮觀之脅貴中而
賤兩端骨貴右而賤左貴前而賤後貴上而賤下○
將傳云齊也王肅云分齊其肉所當用○箋云有奉
持而進之者疏云是司徒小子之類然羣臣助祭各
有所掌奉持進之非獨此二職而已○大司徒云祀
五帝奉牛牲羞其肆享先王亦如之小子職云掌祭

祀羞羊肆羊殽肉豆

祭

周禮大宗伯以吉禮事邦國之鬼神示○尚書大傳云祭之爲言察也察者至也至者人事也人事至然後祭祭者薦也薦之爲言在也在也者在其道也○禮記云禮有五經莫重于祭夫祭者非物自外至者也自中出生于心者也心怵而奉之以禮是故惟賢者能盡祭之義

神保

朱傳云神保益尸之嘉號○禮記曲禮云爲人子者

祭祀不爲尸又云孫可以爲王父尸子不可以爲父尸曾子問孔子曰祭成喪者必有尸尸必以孫孫幼則使人抱之無孫則取于同姓可也祭殤必厭蓋弗成也禮器云周坐尸詔侑武無議曰方其禮亦然其道一也夏立尸而卒祭殷坐尸周旅酬六尸郊特牲云舉斚角詔妥尸古者尸無事則立有事而後坐也尸神象也小記父爲士子爲天子諸侯則祭以天子諸侯其尸服以士服父爲天子諸侯子爲士祭以士其尸服以士服少儀婦人爲尸坐則不手拜櫜記孔子云尸弁冕而出卿大夫士皆下之尸必式必有前驅

祭統云尸諛君與卿四人餽尸在廟外則疑于臣在廟中則全于君又云尸飲三衆賓飲一示民有上下也○周禮掌次凡祭祀張尸次守祧祭祀各以其服授尸大司樂尸出入則令奏肆夏大祝凡大禋祀肆享祭示則執明火而號祝隋則執纛逆牲逆尸令鐘鼓侑亦如之相尸禮小祝大祭祀逆尸沃尸盥節服氏郊祀裘冕二人執戈送逆尸士師若祭勝國之社則爲之尸祀五帝則沃尸○士虞禮尸服卒者之上服男男尸女女尸必使異姓不使賤者○逸禮記禘禮云毀廟之主升合食而立二尸○曾子云王者宗

言終類考 禮記卷之二十一 三
廟以卿爲尸不以公爲尸辟嫌也○禮書云天子諸
侯之尸以卿大夫則幼者不與禮曰尸必以孫孫則
使人抱之此大夫士之禮與喪禮始喪而奠則無尸
以人道事之也既葬而祭則有尸以神道事之也祭
祀同九則一尸儀禮男男尸女女尸謂虞祭也大夫
前祭一日筮尸士前祭三日筮尸大夫于尸再宿而
一戒士于尸一宿而無戒推而上之人君蓋亦前三
日筮尸而宿戒之儀又加隆矣

祝告

箋云祝致神意造主人使受嘏嘏之禮祝徧取黍稷

牢肉魚牯

耳誰反

于醢以授尸孝孫前就尸受之天子

使宰夫受之以筐祝則釋嘏辭以勅之○禮運曰修其祝嘏又云祝以孝告嘏以慈告又云天子祭宗廟諸侯祭社稷祝嘏莫敢易其常是謂大嘏曾子問曰攝主不嘏郊特牲曰嘏長也大也○特牲饋食尸九飯主人醕尸尸酢主人佐食搏黍稷授祝祝授尸尸授以菹豆執以親嘏主人主人左執角百拜稽首受復位詩懷之實于左袂掛于季指卒角拜尸答拜主人出寫醬于房祝以籩受少牢饋食尸十二飯主人醕尸尸酢主人上佐食以綏祭二佐食各取黍于一

教上佐食兼受搏之以受尸尸執以命祝卒命祝祝
受以東北面于尸西以嘏于主人曰皇尸命工祝承
致多福無疆于女孝孫來女孝孫使女受祿于天宜
稼于田眉壽萬年勿替引之主人坐奠爵興百拜稽
首興受黍坐振祭嘑之詩懷之實于左袂挂于季指
執爵以興坐卒爵執爵以興出宰夫以盥受嚮黍主
人嘗之納諸內

孝孫徂位

箋云祭禮畢孝孫徂位堂下西面位祝于是致孝孫
之意告尸以利孝疏云孝孫在堂下西面則祝當以

西階下告○特牲云主人出立于戶外西南祝東向告利成尸謖注云利猶養也供養之禮成少牢云主人出立于阼階上西面祝出立于西階上東面祝告曰利成祝入尸謖賈公彥云特牲戶外告利成少牢階上告利成以尊者稍遠于尸若天子諸侯禮畢于堂上告利成

送尸

大司樂云尸出入奏肆夏○樂師敎樂儀行以肆夏○鐘師凡樂事以鐘鼓奏九夏肆夏杜子春云呂叔玉云肆夏周頌時邁也肆遂也夏大也言遂于大位

言系類三
謂王位也玄謂九夏皆詩篇名○名物疏云按尸出入奏肆夏天子之禮也古注以楚茨之詩爲思古明王故箋用周禮之文朱子以爲述公卿有田祿者力農奉祭則與天子之禮不同而此傳云奏肆夏未知所出考之儀禮大射公叔卽席奏肆夏燕禮賓及庭奏肆夏則諸侯得奏肆夏天子畿內公卿比外諸侯或亦奏肆夏未可知但天子公卿及諸侯祭禮亡無所據證朱子此篇之傳如主人往阼階下西面聽告利成皆準少牢饋食禮少牢饋食者諸侯卿大夫之祭禮也其儀告利成後祝入尸謏主人降立于阼階

東西面祝先尸從遂出于廟門無鼓鐘送尸之事故
特牲云大夫之奏肆夏也由趙文子始也是諸侯之
卿大夫不得奏肆夏也

諸宰

周禮膳夫上士二人中士四人下士八人凡王祭祀
賓客食則徹王之胾俎注云膳夫親徹胾俎胾最
尊也餘則其屬徹之

徹

周禮膳夫祭祀賓客食徹王之胾俎九嬪祭祀徹豆
籩內宗及以樂徹則佐傳豆籩外宗佐王后舐豆籩

以樂徹亦如之樂師及徹師學士而歌徹小師大祭祀徹歌○特牲云宗婦徹祝豆籩入於房徹主人薦俎佐食徹尸薦俎賓出佐食徹阼俎堂上俎畢出有司徹云司士歸尸侑之俎主人退有司徹若不賓尸衆賓出婦人乃徹徹室中之饌

燕私

禮記云若公與族燕則異姓爲賓膳宰爲主人公與父兄齒族食世降一等又云旁治昆弟合族以食序以昭穆別之以禮義人道竭矣又云因其酒肉聚其宗族以教民睦○特牲禮俎出于廟門徹庶羞設于

西序下注云庶羞主爲尸非神饌也此徹庶羞置西序下者爲將燕飲自尸祝至兄弟之庶羞宗子以與族人燕飲于堂內賓宗婦之庶羞主婦以燕飲于房○尚書傳曰宗室有事族人皆侍終日大宗已侍于賓奠然後燕私燕私者何也已而與族人燕也飲而不醉是不親醉而不出是不敬○禮書云族燕禮服皮弁服卽于路寢宰夫爲主異姓爲賓王與族人燕于堂後帥內宗之屬燕于房其物殽蒸所以合好也其食世降一等所以辨親疎也昭穆以序之所以明世次也夜飲以成之所以別異姓也若夫几席之位

詩經釋義 卷八 禮者者一
升降之儀脫屨而坐立監相禮羞庶羞以盡愛爵祿
無美以盡歡大率與諸侯燕禮不異

啓毛取血膋

郊特牲云毛血告幽全之物貴純之道也注云幽謂
血也禮器云納牲詔于庭血毛詔于室羹定詔于堂
○楚語觀射父云毛以示物血以告殺接誠拔取以
獻具爲齊敬也注云物色也告殺明不因故也○又
郊特牲云取腍骨燔燎升首報陽也又曰蕭合黍稷
臭陽達于墻屋故旣奠然後焚蕭合粢糲注云蕭香
蒿柒以脂合黍稷燒之○賈公彥云案說文及字林

胙血祭膋是牛腸間脂也是胙爲血膋爲腸間脂也

社

鄭駁異義云社者五土之神能生萬物者以古之有大功者配之祭法曰共工氏之霸九州也其子曰后土能平九州故祀以爲社又曰后土則社○孝經說社者土地之主土地廣博不可徧敬故封土以爲社而祀之報功也○周禮大司徒設其社稷之壇而樹之田主封人掌設王之社壝凡封國設其社稷之壇今社稷之職鼓人以靈鼓鼓社祭舞師掌教帔舞帥而舞社稷之祭祀牧人陰祀用黝牲毛之大宗伯以

血祭祭社稷王大封則先告后土小宗伯掌教國之神位右社稷左宗廟凡天地之大災類社稷宗廟則爲位若大師則帥有司而立軍社奉主車肆師社之日涖卜來歲之稼噎人凡祭祀社壇用大壘司服祭社稷五祀則希冕大司樂乃祭太簇歌應鐘舞咸池以祭地示大祝大師宜于社大會同宜于社大司馬仲春教振旅以祭社若師有功獻于社○王制云諸侯祭社稷月令仲春擇元日命民社孟冬大割牲于公社禮運云命降于社之謂穀地又曰祀社於國所以列地利禮器云三獻燭郊特牲曰郊特牲而社稷

大牢又曰社祭土而主陰氣也君南向于北牖下答陰之義也日用甲用日之始也天子大社必受霜露風雨以達天地之氣也社所以神地之道地成萬物故教民美報焉家主中雷國主社示本也唯爲社事單出里唯爲社田國人畢作唯社丘乘共粢盛所以報本反始也祭法王爲羣姓立社曰太社王自爲立社曰王社諸侯爲百姓立社曰國社諸侯自爲立社曰侯社大夫以下成羣立社曰置社厲山氏之有天下也其子曰農能殖百穀夏之衰也周棄繼之故祀以爲稷共工氏之霸九州也其子曰后土能平九州

故祀以爲社○名物疏按毛傳云社后土也鄭依孝
經緯以社爲五土之總神所謂五土者山林川澤丘
陵墳衍原隰也非左傳履后土之后土也左傳蔡墨
云共工氏有子曰句龍爲后土后土爲社則后土是
官名句龍配食于社亦稱爲社也祭社必及稷以同
功均利故也稷配以柱商時又易以棄禮有大社鄭
云在庫門內雉門外之右卽冢土也王社先儒或謂
建于大社之西國社侯社宜亦如之賈公彥從崔氏
之說謂王社侯社在籍田內然歷代籍田但祭先農
不聞祭社也白虎通云天子之社壇方五丈諸侯半

之其主則石也其列則社東稷西也其牲則天子太牢諸侯少牢也其祭有三時仲春命民社孟冬大飗牲于公社及孝經緯仲秋穰禾拜社稷是也太社國社有稷而王社侯社不置稷者或爲民祈報或但祭國之土示也此外又有勝國之社市中之社若大夫之社其大者則三千五百家爲之周禮所云州社也其小則二十五家亦爲之左傳所云書社于社也又鼓人注云社祭祭地祇則大地與神州之祇俱蒙社名故中庸云郊社之禮所以事上帝也此篇首章云或耘或耔已是夏耘之事此章云以社以方鄭氏以

爲秋報農夫之慶以爲大蜡勞農下文祭田祖鄭又
以爲始耕之事故嚴氏定爲明年春之事而以下章
爲成王省耕朱子又以下章爲省耘予以爲一篇之
詩首尾聯貫強分二年甚爲無謂月令云仲夏大雩
帝乃命百縣雩祀百辟卿士有益于民者以祈穀實
凡祀五精之帝必配以五人帝神農以配赤熒怒若
勾芒蓐收勾龍后稷之等舉該于百辟卿士內矣正
應經文祈甘雨介黍稷之事于義爲允不必有秋報
春祈紛紛之說禮正月祈穀于上帝不聞祈雨也

方

曲禮云天子祭四方歲徧注云祭四方謂祭五官之神于四郊也勾芒在東祝融后土在南蓐收在西玄冥在北○周禮大宗伯以血祭祭五祀注云五祀者五官之神在四郊四時迎五行之氣于四郊而祭五德之帝亦食此神焉大司馬仲秋云遂以獮田羅幣獻禽以祀祊注云祊當爲方獮田主祭四方報成萬物詩云以社以方○左傳蔡墨云少昊氏有四叔曰重曰該曰修曰熙實能金木及水使重爲勾芒該爲蓐收修及熙爲玄冥世不失職遂濟窮棄此其王祀也顓頊氏有子曰犁爲祝融共工氏有子曰句龍爲

后土此其二祀也○鄭志答趙商云犂爲祝融句龍
爲后土左氏下言后土爲社謂暫作后土無有代者
故先師之說犂兼之因火土俱位南方○祭法四坎
壇祭四方也注山林丘陵于壇川谷於坎○東方者
動方也萬物始動生也南方者任養之方萬物懷任
也西方者遷方也萬物遷落也北方者伏方也萬物
伏藏也水之爲言濡也陰化沾濡木之爲言觸也陽
氣動躍火之爲言化也陽氣用事萬物變化也金之
爲言禁也陰始起萬物禁止土之爲言吐也土在中
央主吐含萬物東方之神句芒芒之爲言萌也南方

之神祝融祝融者屬續其精也西方之神蓐收蓐收者縮也北方之神玄冥玄冥者入冥也

農夫慶

箋云謂大蜡之時勞農以休息之也○周禮黨正國索鬼神而祭祀則以禮屬民而飲酒于序鼓人凡祭祀百物之神鼓兵舞帛舞者大宗伯以醴音辭辜祭四方百物司服祭羣小祀則玄冕大司樂凡六樂者一變而致羽物及川澤之示再變而致羸物及山林之示三變而致鱗物及丘陵之示四變而致毛物及墳衍之示五變而致介物及土示六變而致象物及天

神籥章因祭蜡則吹豳頌擊土鼓以息老物羅氏蜡則作羅襦梓人張獸侯以息燕○月令孟冬祈來年于天宗臘先祖五祀勞農而休息之郊特牲云天子大蜡八伊耆氏始爲蜡蜡也者索也歲十二月合聚萬物而索饗之也主先嗇而祭司嗇也祭百種以報嗇也饗農及郵表畷秣少反禽獸仁之至義之盡也迎貓爲其食田鼠也迎虎爲其食田豕也祭坊與水庸事也皮弁素服而祭素服以送終也葛帶榛杖喪殺也黃衣黃冠而祭息田夫也八蜡以記四方四方年不順成八蜡不通以謹民財也順成之方其蜡乃通

以移民也既蜡而收民息已故既蜡君子不興功明
堂位云大蜡天子之祭也雜記子貢觀蜡曰一國之
人皆若狂孔子曰百一之蜡一日之澤○傳曰夏曰
嘉成殷曰清祀周曰大蜡秦初曰臘○禮書云蜡祭
川澤山林以至土示天神莫不與焉而所重者八先
嗇也司嗇也百種也農也郵表畷也禽獸也坊也水
庸也既蜡則臘先祖五祀于廟蜡以息老物臘以息
民

子孫奏能

鄭氏云土之祭禮上嗣舉奠因而酌尸天子則有子

孫獻尸之禮○劉瑾云特牲三獻之後長兄弟洗觶獻尸尸飲畢酢之長兄弟受而卒爵少牢下篇三獻之後亦有二人洗觶酌獻之禮各奏爾能謂此類與

室人

孔氏曰特牲注云佐食賓佐尸食者也謂于賓客之中取人令佐主人爲尸設饌食特牲佐食一人少牢佐食二人未知天子諸侯當幾人也特牲三獻之後長兄弟洗觶爲加爵又曰衆賓長爲加爵注云大夫三獻而禮成多之者爲加是賓手挹酒室人復酌爲加爵也特牲止有賓長爲加爵不及佐食此言賓與

室人俱爲加爵者天子之禮大故佐食亦爲加也○
特牲記云佐食玄端玄裳黃裳雜裳可也皆爵軫佐
食當事則戶外南面無事則中庭北面凡祝呼佐食
許諾佐食于旅齒于兄弟

裸將

周禮小宰祭祀贊王裸將之事注云將送也贊王酌
鬱鬯之酒以獻尸謂之裸裸之言灌也明不爲飲主
以祭祀唯人道宗廟有裸天地大神至尊不裸莫稱
焉凡鬱鬯受祭之啐之奠之又云凡賓客贊裸內宰
后裸獻則贊凡賓客之裸獻皆贊大宗伯大賓客攝

后載果

讀作裸

小宗伯凡祭祀賓客以時將肆裸肆師

祭祀賓客贊裸將鬱人凡裸事和鬱鬯司尊彝祠禴裸用雞彝鳥彝嘗蒸裸用斚彝黃彝追享朝享裸用虎彝雝彝行人諸公再裸而酢侯伯子男一裸而酢○禮器云諸侯相朝灌用鬱鬯郊特牲云周人尚臭灌用鬯臭既灌然後迎牲祭統曰君執圭瓚裸尸大宗執璋瓚亞裸又云獻之屬莫重于裸

文定厥祥

士昏禮云下達納采用雁請問名納吉用雁如納采禮納徵玄纁束帛儷皮如納吉禮請期如納徵禮記

曰納吉曰吾子有貺命某加諸卜占曰吉使某也敢告納徵曰吾子有嘉命貺室某也某有先人之禮儷皮束帛使某也請納徵○周禮嫫氏云凡嫁女娶妻入幣純帛無過五兩玉人云穀圭天子以聘女大璋諸侯以聘女○雜記云納幣一束束五兩兩五尋昏義云納采問名納吉納徵請期皆主人筵几于廟拜迎于門外入揖讓而升聽命于廟○賈公彥云納幣士大夫以玄纁束帛天子加穀圭諸侯加大璋庶人用緇無纁○孔穎達云納幣昏禮謂之納徵

親迎

言終難考 禮者卷一 四
郊特牲曰親迎男先于女剛柔之義也執贄以相見
敬章別也壻親御授綏親之也出乎大門而先男帥
女女從男夫婦之義由此始也哀公問曰冕而親迎
不已重乎孔子曰合二姓之好以繼先聖之後以爲
天地宗廟社稷之主君何謂已重乎昏義云父親醮
子而命之迎男先于女也子承命以迎主人筵几于
廟而拜迎于門外壻執雁入揖讓升堂再拜奠雁蓋
受之于父母也降出御婦車而壻授綏御輪三周先
俟于門外婦至壻揖婦以入共牢而食合卺而醕所
以合體同尊卑以親之也○昏禮記曰父醮子命之

辭曰往迎爾相承我宗事勗帥以敬先妣之嗣若則有常○禮書趙氏曰王者之尊天下莫敵故嫁女則使諸侯主之適諸侯諸侯莫敢有其室若屈萬乘之尊行親迎之禮則何莫敵之有乎夫子對哀公云云非爲天子發也左氏謂諸侯不親迎公羊謂天子亦親迎其說不能全與經合當從趙氏爲正

類

爾雅云是禴是禡師祭也疏云王制云天子將出征類于上帝則類祭祭天也尚書歐陽說以事類祭之在南郊春官肆師注云類禮依郊祀是用尚書說爲

義也○書曰類于上帝○周禮小宗伯兆五帝于四郊四望四類亦如之凡天地之大裁類社稷宗廟則爲位肆師類造上帝則爲位大祝六祈一曰類大師類上帝詛祝掌類造之祝號○禮記天子將出類于上帝天子將出征類于上帝注云帝謂五德之帝○禮書云類皆有所祈其禮劣于正祭與旅

禡

爾雅云禡師祭也○禮記云天子出征禡於所征之地○周禮小宗伯甸役之禱祠肆儀爲位肆師四時大田獵祭表貉則爲位注云于所立表之處爲師祭

造軍法者禱氣勢之增倍也其神蓋蚩尤或曰黃帝
又云甸祝掌表貉之祝號大司馬教振旅有司表貉
教大閱設驅逆之車有司表貉于陣前○公羊說云
師出曰祠兵祠者祠五兵矛戟劍楯弓鼓及祠蚩尤
之造兵者○應劭云至所征之地表面祭之謂之禡
禡者馬也馬者兵之首故祭其先神也○考索云漢
書稱高祖祠黃帝與蚩尤戰于阪泉豈軍法之興始
此故後世因祭之與

禋祀

箋云禋祀上帝于郊禩○月令仲春玄鳥至至之日

以太牢祠于高禩天子親往后妃帥九嬪御乃禮天子所御帶以弓韜授以弓矢于高禩之前蔡邕云高猶尊也禩者所以祈子孫之祀鄭玄云高辛氏之世玄鳥遺卵娥簡吞之而生契後王以爲媒官嘉祥而立其祠變媒言禩神之也孔穎達云契以前祭天南郊以先媒配蓋伏羲也至高辛簡狄之異後王以是爲媒官之嘉祥卽以高辛之君立爲媒神以配天○五經要義云玄鳥感陽而至集人棟宇有華乳之祥故重其至日因以用事○王居明堂禮云帶以弓韜禮之禩下其子必得天材○盧植云玄鳥至時陰陽

中萬物生故于是以三牲請于高禋之神居明顯之處故謂之高因求子故謂之禋因以爲古者有媒氏之官因以爲神○五經通義云王者十歲七祭天地仲春后妃祀高禋亦祭天地也○古言高禋卽先禋亦曰郊禋又曰人先

輶

周官大馭掌馭玉路以祀及犯輶王自左馭馭下祝登受轡犯輶遂驅之及祭酌僕僕左執轡右祭兩軹祭軹乃飲注云行山曰輶犯之者封土爲山象以菩芻栢棘爲神主旣祭之以車轢之而去喻無險難戎

僕犯輶如玉路之儀又犬人凡祭祀供犬牲用牲物
伏瘞亦如之注云伏謂伏犬以王車轡之○聘禮記
出祖什輶祭酒脯乃飲酒于其側○月令孟冬其祀
行祭先腎注云行在廟門外之西爲輶壤厚二寸廣
五尺輪四尺○祭法王立七祀曰國行諸侯立五祀
曰國行大夫立三祀曰行適士立二祀曰行○崔靈
恩云宮內之輶祭古之行神城外之輶祭山川與道
路之神○孔氏曰輶本山行之名以祭道路之神爲
之在國門外卿大夫用酒脯天子以犬諸侯以羊禮
畢乘車轡之月令冬祀行注依中霽之禮有主有尸

用特牲是天子諸侯常祀與輟異也輟又名祖聘禮
及詩云出祖是也又名道曾子問云道而出是也○
風俗通云按禮傳共工之子曰修好遠遊舟車所至
足蹟所達靡不窮覽故祀以爲祖神祖者祖也○顏
師古云祖者送行之祭昔黃帝之子纁祖好遠遊而
死于道故後人祭之以爲行神○晉稽含祖道賦序
曰祖之在于俗尚矣自天子至庶人莫不咸用有漢
卜日丙午魏氏擇其丁未至于大晉則祖孟月之酉
日各因其行運三代固不同雖其奉祖莫識祖之所
興也說文祈請道神謂之祖有事于道者吉內皆名

言類卷之二 禮記卷之二
君子行役則列之于中路喪者將遷則稱名于階庭
或云百葉遠祖名皆凋滅墳塋不復存其銘表遊竟
不得托于廟祧智者故以歲初良辰肇建華揮揚綵
旗將欲招靈爽于今夕庶衆祖之來憑蓋有兩端俯
歎壯觀乃述而賦之

釋祭尸 二丘尸 三祀尸

箋云首章尸在宗廟次章祭四方百物之尸三章祭
天地之尸四章祭社稷山川之尸五章七祀之尸疏
云宗廟祭後燕尸大夫謂之賓尸卽用祭日天子諸
侯謂之釋以祭之明日燕祭天地之尸卽以祭日其

餘諸神亦以其日也○鳧鷖首章箋云祭祀既畢明日又設禮而與尸燕○爾雅云繹又祭也周曰繹商曰彤夏曰復胙○公羊傳云繹者何祭之明日也○穀梁云繹者祭之旦日之享賓也○禮器云設祭于堂爲祊乎外故曰于彼乎于此乎郊特牲孔子曰繹之于庫門內祊之于東方失之矣注云祊之禮宜于廟門外之西室繹又于其堂神位于西也祭義曰君牽牲夫人奠盞君獻尸夫人薦豆注謂繹日也又曰祭之日明發不寐饗而致之又從而思之祭統曰詔祝于室而出于祊此交神明之道也○禮書曰繹于

明日則異牲詩曰自羊徂牛是也賓尸于祭日則用
正祭之牲而已有司徹音尋尸俎是也蓋正祭重而
主于禮神繹輕而主于禮尸重故省牲視具在宗伯
輕故使士而爵弁絲衣者也主于禮神故在室主于
禮尸故在堂則自堂徂基掃堂設筵者皆堂上之事
○鳧鷖三章箋云渚猶平地之有丘喻祭天地之尸疏
云此唯喻二至之祭其文不及郊○周禮太宰祀天
神示掌百官之誓戒與其具修掌次王旅上帝則張
壇案設皇邸司裘掌爲大裘以共王祀天之服大宗
伯以禋祀祀昊天上帝以蒼璧禮天以黃琮禮地牲

幣各放其器之色注云此禮天以冬至謂天皇大帝
在北極者也禮地以夏至謂神在崑崙者也又云凡
祀大神祭大示帥執事而卜日宿眡滌濯省牲饌奉
玉齋詔大號司服王祀昊天上帝則服大裘而冕大
司樂凡樂園鍾爲宮黃鍾爲角太簇爲徵姑洗爲羽
鼙鼓鼙鼗孤竹之管雲和之琴瑟雲門之舞冬至日
于地上之圜丘奏之若樂六變則天神皆降可得而
禮矣函鍾爲宮太簇爲角姑洗爲徵南呂爲羽靈鼓
靈鼗絲竹之管空桑之琴瑟咸池之舞夏日至于澤
中之方丘奏之若樂八變則地示皆出可得而禮矣

凡以神示者以冬至致天神人鬼以地日至致地

示物彫

同

○曲禮曰天子祭天地歲徧禮器云祭天

特牲又云爲高必因丘陵爲下必因川澤是故因天
事天因地事地○名物疏按二郊二丘鄭氏分而爲
四冬至至園丘所祭之天謂之昊天上帝卽北辰耀
魄寶也又謂之天皇大帝又謂之太一帝君夏日至
方丘所祭之地謂崑崙地祇也王者各稟五帝之精
氣而王天下于夏正建寅之月祭于南郊謂之感生
帝月令云孟春元日祈穀于上帝卽此祭也北郊所
祭乃神州地祇或曰合祀于夏正之月或云建申之

月祭之冬至祭昊天周人配以魯南郊祭感帝周人配以稷祭法所謂禘嘗而郊稷也王肅之徒則以郊丘爲一按記云周之始郊日以至則郊以冬至有合王說爾雅云祭天曰燔柴祭地曰瘞薶與泰壇泰圻之禮同若祭以掃地薦以血牲以犢車以大路樽以犧寓以匭布杓以禋器以陶匏藉以蒲越藁秸櫛大圭執鎮圭及卜郊聽報尚書稱用牲于郊社皆詳于郊而略于丘則郊丘爲一王論確矣爲鄭學者則云周禮祀昊天上帝大裘而冕郊特牲云郊祭之日戴冕藻十有二旒是服不同也周禮玉路以祀天郊特

言系類三
牲云乘素車是車不同也祭法云燔柴于泰壇用騂
犢周禮蒼璧禮天牲從玉色是牲不同也爾雅云非
人爲之丘泰壇泰圻人力所爲又與方圓之丘別故
知郊丘有異按家語云臨燔柴脫衮冕著大裘象天
則初服衮冕後著大裘知所說服同矣素車雙禮也
玉路周禮也乃二代車制有異非郊丘爲二是車之
不同不足論矣郊特牲云牲用騂牧人云陽祀用騂
牲是也宗伯云皆有牲幣各放器之色則其說踳駁
或記者因周尚赤牲用騂故槩云騂犢而二至之祭
實用蒼黃之牲與其詳不可得而考要之以郊丘爲

一者其理爲勝若爾雅丘字之訓又不足辨什丘云絕高爲京非人爲之丘毛傳云京高丘也則散文亦通矣詩禮有郊社之文不聞有圓丘配嚳之說禘蓋宗廟五年之大祭祀其祖之所出而不以配天也此外有迎氣四郊及季夏祭黃帝含樞紐所謂祭五帝也又四月龍見而雩總祭五帝于南郊季秋又大饗五帝于明堂皆祭大微五精之帝也祭地自崑崙神州大示而下至五土之示成羣之置社皆遙示之屬矣

鳧鷖卒章箋云燕七祀之尸○曲禮云天子諸侯大

夫祭五祀歲徧月令春祀戶祭先脾夏祀竈祭先肺
季夏祀中霤祭先心秋祀門祭先肝冬祀行祭先腎
孟冬臘先祖五祀禮器曰禮行五祀正法則也家主
中霤國主社郊特牲云三獻文祭法云王爲羣姓立
七祀曰司命曰中霤曰國門曰國行曰泰厲曰戶曰
竈王自爲立七祀諸侯爲國立五祀曰司命曰中霤
曰國門曰國行曰公厲諸侯自爲立五祀大夫立三
祀曰族厲曰門曰行適士立二祀曰門曰行庶士庶
人立一祀或立戶或立竈○白虎通云祭五祀天子
諸侯以牛卿大夫以羊因四時牲也一說戶以羊竈

以雉中霤以豚門以犬井以豕或曰中霤用牛餘不得用○禮書云考之于禮五祀之牲牛牲凡祭五祀于廟有主有尸觀月令臘先祖五祀同時則五祀祭于廟可知也曾子問既殯祭五祀尸入三飯則五祀有尸可知也既殯而祭不醕不酢則凡祭五祀固有侑醕與酢矣老婦之祭先儒以爲竈配則五祀固有配矣先儒又謂卿以上宗廟有主五祀亦有主矣大夫以下宗廟無主五祀亦如之然大夫之廟未嘗無主五祀有主與否不可考也

郊 附方丘

通典云夫聖人之運莫大乎承天天行健其道變化故庖犧氏仰而觀之以類萬物之情黃帝封禪天地少昊載時以象天顓頊乃命南正重司天以屬神高辛順天之義帝堯命羲和敬順昊天故郊以明天道也所從來尚矣有虞氏禘黃帝而郊嚳夏后氏禘黃帝而郊鯀殷人禘嚳而郊冥○周禮大司樂云冬至日祀天於地上之圓丘禮神之玉以蒼璧其牲及幣各隨玉色牲用一犢幣用繒長丈八尺王服大裘其冕無旒大裘黑羔裘既無采章則冕亦無旒也尸服亦然以天體質故王大裘以象之尸為神象宜與王服同也周禮曰郊祀二人乘表冕盥送尸又士師職曰祀五帝則天盥送尸乘

玉輅錫繁纓十有再就建太常十有二旒以祀罍及

薦菹醢器並以瓦爵以匏片爲之以藁秸及蒲但剪

頭不汙爲籍神席藁秸籍天神配以帝嚳其樂大司

樂云鼙鼓鼙鼗孤竹之管雲和之琴瑟雲門之舞冬

至日于地上之園丘奏之若樂六變則天神皆降可

得而禮矣其感生帝大傳曰禮不王不禘王者禘其

祖之所自出以其祖配之王者先祖皆感太微五帝

春秋緯說蒼則靈威仰赤則赤熛怒黃則含樞紐白

則白招拒黑則協光紀皆用王歲之正月郊祭之蓋

特尊因以祈穀其壇名泰壇在國南五十里牲用騂

犢青幣配以稷其配帝牲亦騂犢日用辛○又王者

言經義卷之五
必五時迎氣以示人奉承天道從時訓人之義故月
令于四立日及季夏土德王日各迎其王氣之神于
其郊其配祭以五人帝春以太皞夏以炎帝季夏以
炎帝秋以少昊冬以顓頊其壇位各于當方之郊爲
兆位于中築方壇亦名曰泰壇而祭之祭前期十日
王親戒百官及族人太宰又總戒羣百官曰某日有
事于昊天上帝各揚其職百官廢職服大刑乃習射
于澤宮選可與祭者其日王乃致齋于路寢之室祭
日之晨雞人夜呼晨以叫百官巾車鳴鈴以應雞人
典路乃出玉輅建太常大司樂旣宿懸遂以聲展之

知完否王將出大司樂令奏王夏王所過處之人各
于田首設燭以照于路又喪者不敢哭凶服者不敢
入國門祭前掌次先于丘東門外道北設大次小次
次謂幃幄初往止居小幄接祭退俟之處祭義曰周
人祭日以朝及闇雖有強力孰能支之是以有退俟
與諸臣代有事焉王服大裘而立于丘之東南西面大司樂
奏圓鍾爲官以下之樂以降神次則積柴于丘壇上
王親牽牲而殺之次則實牲體玉帛而燔之謂之禋
祀禋之言煙也以周人尚臭煙
祀氣之臭聞者所以報陽也次乃掃于丘壇上而
祭尸服裘而升丘也王及牲尸入時樂章奏王夏肆
夏招夏就坐時尸前置蒼璧又薦邊豆及血腥等爲

重古之薦王乃以匏卣爲爵酌瓦甒之泛齊以獻尸
爲朝踐之獻五齊之名一曰泛齊二曰醴齊三曰盎
齊四曰緹齊五曰沈齊七獻七獻者薦血腥後王以
匏爵酌泛齊以獻尸所謂朝踐是也此爲一獻次大
宗伯攝王后之事亦以匏爵酌醴齊亞獻亦爲朝踐
是二獻每獻奏樂一成次薦熟于神前薦畢王乃以
匏爵酌盎齊以獻尸大宗伯以匏爵酌緹齊以亞獻
所謂饋獻也通前凡四尸乃食食訖王更酌朝踐之
泛齊以酌尸所謂朝獻大宗伯更酌饋獻之緹齊以
亞酌所謂再獻通前凡六又有諸臣爲賓酌沈齊以

獻尸凡七也其尸酢諸臣之酒皆用三酒

酒正云事酒清酒昔

酒其法如祫祭禮畢獻之後天子舞六代之樂若感生帝及迎氣卽天子舞當代之樂其樂章用昊天有成命也○五經通義曰王者所祭天地何王者父事天母事地故以子道祭日以丁與辛何丁者反覆丁寧也辛者自克辛也

王者父天母地故庖犧氏俯仰而觀法焉顓頊乃命火正黎司地以屬人夏以五月祭地祗殷以六月祭周制大司樂云夏日至禮地祗于澤中之方丘其丘在國之北禮神之玉以黃琮

琮八方象地

牲用黃犢幣用黃

繒王及尸同服大裘配以后稷夏日至于澤中之方
丘奏樂八變則地祇皆出可得而禮矣其神州地祇
謂王者所卜居吉土五千里之內地名也牲用黝犢
幣用黑繒其壇于北郊築土爲壇名曰大折注云折
炤晰昭明之名配亦以后稷備五齊七獻王及尸服
齋戒乘路酒樽薦菹醢之器藉神席藁秸蒲越及雞
人呼晨司樂宿懸掌次設次大宗伯設亞獻並如圓
丘其日王服大裘立于方丘東南西面乃奏函鍾爲
宮以下之樂以致其神訖王又親牽牲取血并玉瘞
之以求神謂之二始尸前旣置玉帛等訖次則王以

匏片爲爵七獻並如圓丘王每獻酒皆作樂一終

奠瘞

孔氏曰奠謂置之于地瘞謂埋之于地禮與物皆謂爲禮事神之物酒食牲玉之類也○爾雅曰祭天曰燔柴祭地曰瘞埋疏云祭天之禮積柴以實牲體玉帛而燔之使煙氣之臭上達于天祭神州地示于北郊瘞繒埋牲因名祭地曰瘞埋

宗

傳云宗尊也凶荒索鬼神而祭之○周禮大司徒荒政十有二曰索鬼神黨正春秋祭禘大祝掌六祈類

造禋崇攻說小祝掌候穰禱祠之祝號以逆時雨寧
風旱○祭法云埋少牢于泰昭祭時也相近于坎壇
祭寒暑也王宮祭日也夜明祭月也幽宗祭星也雩
宗祭水旱也四坎壇祭四方也山林川谷丘陵能出
雲爲風雨見怪物皆曰神有天下者祭百神注相近
當爲穰祈宗皆當爲崇疏此經所載謂四時垂序寒
暑僭逆水旱失時須有祈禱非關正禮之事○左傳
子產云山川之神則水旱癘疫之災于是乎禋之日
月星辰之神則雪霜風雨之不時于是乎禋之

羣公先正

月令仲夏命有司爲民祈祀山川百源大雩帝用盛樂乃命百縣雩祀百辟卿士有益于民者以祈穀實百辟卿士古者上公若勾龍后稷之類疏百辟則古之上公國語鯀爲宗伯祭法有祀之文社稷五祀雖爲王朝卿士兼帶上公之官故左傳云封爲上公祀爲貴神○周禮舞師掌教皇舞帥而舞旱暵之事稻人旱暵共其雩斂司巫若國大旱則帥巫而舞雩女巫巫旱暵則舞雩○左傳云龍見而雩○鄭曉古言曰宗讀爲祭讀如字者誤矣夫雩請雨故魯旱則雩祭請霽故鄭水則祭古之人雩祭以牲雲漢所爲靡愛

斯牲是也。禋祭以牲，春秋大水鼓用牲于社，于門是也。左氏：凡天災有幣無牲之說，豈別有據乎？周禮：雩祭司巫，禋祭鬯人各專其事。漢禮：雩衣皂，禋衣朱，各異其物。蓋雩從雨，禋從火，故雩以女，禋以男。雩于北，禋于南，陰陽之義也。舞皇用瓢，古法也。或謂雩以男，偃禋以管，域更詳之。○周制：月令建巳月大雩，五方上帝其壇名曰雩，禋于南郊之傍，配以五人。帝命樂正習，盛樂。月令云：仲夏樂帥修鞀鞀鼓，均琴瑟管簫，執于戚，弋羽調竽笙篴簧鍾磬祝，敵俱作。故曰盛樂也。舞皇，舞注析白羽爲之，形如帔也。○月令：命有司

爲民祈祀山川百源百辟卿士有益于民者以祈穀
實若國大旱則司巫師巫而舞雩若旱暵則女巫舞
雩○有正雩有因旱而修雩春秋考異郵三時惟有
禱祀無雩祭之事惟四月龍星見始有常雩○正義
天官東方之星盡爲蒼龍之宿雩之言遠也遠爲百
穀祈膏雨豫爲秋收意深遠也○穀梁傳雩者爲旱
求者也求者請也注其禱辭曰方今大旱野無生稼
寡人當死百姓何謗不敢煩民請命願撫萬民以身
塞無狀傳例曰雩得雨曰雩雩不得雨曰旱䟽天子
雩上帝諸侯雩上公正義凡正雩在周之六月公羊

傳大雩旱祭也注君親之南郊以六事謝過自責童
男女各八人舞而呼雩祭法雩宗祭水旱也雩吁嗟
也○春秋繁露曰大旱雩而請雨大水明鼓而攻社
天地之所爲陰陽之所起或請焉或攻焉何也曰大
旱陽滅陰也陽滅陰者尊厭卑固其義也雖大甚拜
請之而已大水者陰滅陽也陰滅陽者卑勝尊也以
賤凌貴者逆節故鳴鼓而攻之朱絲而脅之爲其不
義此亦春秋之不畏強禦也變天地之位正陰陽之
序貞行其道而不忌其難義之至也○論衡董仲舒
雩祭之法設土龍以爲感漢昭帝紀始元六年夏旱

大雩不得舉火注抑揚助陰也通典後漢行雩禮以求雨閉諸陽衣皂興土龍立土人舞僮二列七日一變朱索縈社伐朱鼓禱以少牢

祈年

月令天子廼以元日祈穀于上帝注云謂以上辛郊祭太微之帝疏云郊特牲云郊不言祈穀此經言祈穀不言郊鄭以爲二祭是一故此注謂以上辛郊祭也郊各祭所感之帝殷人祭協光紀周人祭靈威仰○左傳孟獻子云郊祀后稷以祈農事也是故啓蟄而郊郊而後耕注云啓蟄夏正建寅之月耕謂春分

言名義三
禮記卷三
○月令又云孟冬天子祈來年于天宗注云天宗謂日月星辰也○蔡邕云日爲陽宗月爲陰宗北辰爲星宗○大宗伯以實柴祀日月星辰注云星謂五緯辰謂日月所會十二次疏云五緯卽五星東方歲星南方熒惑西方太白北方辰星中央鎮星辰雖報天而主日配以月疏云天帝獨爲壇其日月及天神等各爲一壇○名物疏按此祈來年于天宗旣非遇災禳禱則與祭法所云王宮夜明幽榮祭日月星者異矣又非朝日夕月則與祭義所云祭日于壇祭月于坎者異矣其禮當如郊祭主日配月者日月及五緯星

二十八經星合爲一壇而以實柴祀之牲蓋用牛以
大宗伯注推之可見

受命 入覲

王制云諸侯之世子未賜爵視天子之元士以君其
國○韓詩內傳云諸侯世子三年喪畢上受爵命于
天子○白虎通云世子上受爵命衣士服何謙不敢
自專也故詩曰韎韐有奭世子始行也

覲大宗伯云秋見曰覲大行人云秋覲以比邦國之
功○聘禮云侯氏裨冕什幣于襍乘墨車載龍旂弧
韜乃朝以瑞玉有纁天子設斧依于戶牖之間左右

几天子衮冕負斧依侯氏入門右坐奠圭再拜稽首
擯者謁侯氏坐取圭致命王受之玉侯氏降階東北
面再拜稽首擯者延之曰升升成拜乃出記几侯于
東箱偏駕不入王門奠圭于纁上○箋云韓侯覲于
宣王而奉享禮○周禮內府凡四方之幣獻之金玉
齒革兵器凡良貨賄入焉大行人云廟中將幣三享
注皆束帛加璧庭實惟國所有小行人云合六幣圭
以馬璋以皮璧以帛琮以錦琥以繡璜以黼玉人云
璧琮九寸諸侯以享天子琬琰八寸諸侯以享夫人
○覲禮云四享皆束帛加璧庭實惟國所有注云四

當爲三初享或用馬或用虎豹之皮其次享三牲魚
腊籩豆之實龜也金也丹漆絲纁竹箭也其餘無常
貨惟所有分爲三享皆以璧帛致之又云奉束帛匹
馬卓上九馬隨之奠幣再拜稽首升致命王撫玉侯
氏降自西階東面授宰幣西階前再拜稽首以馬出
授人九馬隨之事畢

贈

覲禮云天子賜侯氏以車服路先設西上路上四亞
之重賜無數在車南諸公奉篚服加命書于其上升
自西階東面太史是右侯氏升西面立太史述命侯

氏降兩階之間北面再拜稽首升成拜太史加書于服上侯氏受○樂記云大路者天子之車也龍旂九旒天子之旌也青黑緣者天子之寶龜也從之以牛羊之羣則所以贈諸侯也

顯相

周語云甸服者祭侯服者祀賓服者享日祭月祀時享○何休公羊注云王者貴得天下之歡心以事其先王因助祭以述其職故分四方諸侯爲五部部有四輩輩主一時孝經曰四海之內各以其職來助祭尚書曰羣后肆朝是也

將享

序云祀文王于明堂疏云此祀明堂是大享五帝非迎氣告朔也五帝之牲用特牛文武爲配于禮得有羊○孝經云昔者周公郊祀后稷以配天宗祀文王于明堂以配上帝是以四海之內各以其職來祭○曲禮云大饗不問卜不饒富月令季秋上丁命樂正入學習吹是月也大享帝樂記曰祀乎明堂而民知孝祭法云虞祖顓頊而宗堯夏祖顓頊而宗禹殷祖契而宗湯周祖文王而宗武王注云祭五帝五神于明堂曰祖宗明堂位云明堂也者明諸侯之尊卑也

周公朝諸侯于明堂制禮作樂頒度量而天下大服
○考工記云夏后氏四室堂修二七廣四修一五室
三四步四二尺九階四旁兩夾窓白盛門堂三之二
室三之一殷人重屋堂修七尋堂崇三尺四阿重屋
周人明堂度九尺之筵東西九筵南北七筵堂崇一
筵五室凡室二筵○周書明堂云方廣一十二尺高
四尺階廣六尺三寸室居中方百尺室中方六十尺
東應門南庫門西臯門北雉門東方曰青陽南方曰
明堂西方曰總章北方曰玄堂中央曰太廟以左爲
左个右爲右个○帝命驗云帝者成天立府以尊天

重象赤曰文祖黃曰神斗白曰顯記黑曰玄矩蒼曰
靈府○舍文嘉云明堂所以通神靈感天地正四時
○禮記外傳云一堂之上爲五室南面三階五室者
象帝載五行也五行生于四時故每室四達○援神
契云周之明堂在國之陽三里之外七里之內在辰
巳

時邁

尚書云歲二月東巡狩至于岱宗柴望秩于山川肆
覲東后協時月正日同律度量衡修五禮五玉三帛
二生一死贄如五器卒乃復五月南巡狩至于南岳

如岱禮八月西巡狩至于西嶽如初十有一月朔巡
狩至于北嶽如西禮歸格于藝祖用特○風俗通曰
巡者循也狩者牧也道德太平王者爲天循行以牧
人也恐遠近不同化幽隱有不得所者故自躬親行
之○禮記曰王者必制巡狩之禮何尊天重民也所
以五年一巡狩何五歲再閏天道大備王者恩亦當
竟也所以至四嶽者盛德之山四方之中能興雲致
雨又曰天子五年一巡狩二月東巡狩至于岱宗柴
而望祀山川覲諸侯問百年者就見之命太師陳詩
以觀民風命市納賈以觀民之好惡○周禮大司馬

云及師大合軍以行禁令以救無辜伐有罪注師謂
巡狩會同職方氏掌天下之圖王巡狩則戒于四方
曰各修平乃守考乃職事無敢不敬戒及王之所行
先道帥其屬而巡戒令王殷國亦如之大行人十有
二歲王巡狩殷國土訓誦訓王巡狩則夾王車○左
傳曰天子非展義不巡狩○白虎通曰巡狩所以四
時出何當承宗廟故不踰也以夏之中月同律度得
其中也○通典曰黃帝祭于山川典禮爲多則山川
秩祀始自黃帝氏也舜典望秩于山川也○孔叢子
云天子將巡狩必告于祖禰命告羣祀及社稷畿內

名山大川七日而遍視牲及用幣

肆祀

序云雖禘太祖也箋云禘大祭也大于四時而小于
祫太祖謂文王玄鳥序云祀高宗也箋云祀當爲祫
高宗崩始合祭于契廟歌是詩焉古者君喪三年旣
畢禘于其廟而後祫祭于太祖明年春禘于羣廟自
此之後五年而再殷祭一禘一祫春秋謂之大事長
發序云大禘也箋云大禘郊祭天也○名物疏按爾
雅云禘大祭也鄭氏之學以爲禘禮有四大司樂園
丘方丘宗廟鄭云此三者皆大祭祭法虞夏禘黃帝

殷周禘嘗注云此祭昊天于圜丘也此禘之一也喪服云天子及其始祖之所出注云始祖之所由出謂祭天大傳云禮不王不禘王者禘其祖之所自出以其祖配之諸侯及其大祖大夫士有大事以省于其君祫及其高祖此謂祭感生帝于南郊禘之二也大宗伯云以肆獻裸享先王以饋食享先王注云祫禘也祫言肆獻禘言饋食互相備明堂位云季夏六月以禘禮祀周公于太廟此禘之三也王制天子諸侯宗廟之祭夏曰禘注云此夏殷祭名周則改之以禘爲殷祭此禘之四也謂之禘者禘諦也言使昭穆之

言類卷之七
次審諦也祭天謂之禘者亦言使典禮諦也此雖禘
太祖蓋五年宗廟之殷祭也其長發大禘則殷以夏
正于南郊祀感生帝叶光紀也其祫祭者王制曰天
子犴禘祫禘祫嘗祫烝諸侯犴禘禘一犴一祫嘗祫
烝祫曾子問云當七廟五廟無虛王者祫祭于祖爲
無主耳又曰祫祭于祖則祝迎四廟之主鄭云魯禮
三年喪畢祫于太祖明年春禘于羣廟自爾之後五
年而再殷祭一祫一禘公羊傳云太祫者何合祭也
毀廟之主陳于太祖未毀廟之主皆升合食于太祖
五年而再殷祭是也其玄鳥祀高宗卽三年喪畢祫

于太祖之廟以新崩之主序昭穆也禮記注稱喪畢
祫于太祖明年春禘于羣廟而玄鳥箋顧有禘于其
廟而後祫祭太祖之文者謂練時遷主遍廟新死者
當禘祭于其廟以安之故啗人云廟用修注云謂始
禘時是也鄭特將練禘總就喪畢言之耳其禘祫之
異者祫則未毀廟之主及毀廟之主皆合祭于太祖
廟中禘則太王王季以上遷主祭于后稷之廟穆之
遷主祭于武王之廟而不及親廟其坐位所向各別
祫用五齊三酒禘惟四齊三酒無汎齊祫備六代之
樂禘惟四代又無降神之樂祫十二獻禘九獻禮器

言終卷之六
云大饗其王事與注云盛饌與貢謂禘祭先王此鄭氏之說謂禘大禘小者然也若王肅張融孔鼂之徒則以禘爲大禘爲小賈逵劉歆杜預之徒則以傳無禘文禘爲三年一次祭在太祖之廟蓋取其序昭穆謂之禘取其合集羣祖謂之禘二禮爲一鄭依禮緯云三年一禘五年一禘謂之百王通義而禘禘志云王制祀禘于秋夏冬周公制禮祭不欲數是又以虞夏殷三時俱殷祭其說自相違背王肅不信六天之說旣無郊丘之分且謂禘惟祭宗廟大傳所謂祭其所自出者謂始祖之父耳陸淳趙匡朱子之徒皆依

而用之禘以夏四月大禘之禮崔靈恩云用秋張純
云用冬十月解禮記者又或謂禘祫嘗祫烝爲時
祭之祫大禘爲三年之祫議禮之家名爲聚訟亦不
得而折其衷也宗廟之禘依鄭氏云祭毀廟不及親
廟陸淳云禘于始祖廟祭所出之帝便以祖配不無
羣廟爲其䟽遠不敢褻狎陳祥道以此說爲不足信
朱子長發傳云大禘不及羣廟之主此宜爲祫祭之
詩蓋同陸說先儒多以不王不禘之文而譏魯僭祭
不知大夫士有大事省于其君得祫高祖大夫士得
祫何疑周公之後不得禘哉春秋傳有禘無祫按諦

言分卷二 禮記卷二 十二
裕志所稱二禮之異俱無証據豈禘祫儀制相似而混爲一與國語云諦祫之牛繭栗又云郊禘之事射牛郊禘之事有全胥又曰天子親春郊禘之盛而不及祫爾雅云禘大祭繹又祭而不云祫故馬端臨云魯之祭卽祫或亦有見與司尊彛四時之間祀追享朝享說者亦以爲禘祫鄭玄以追享爲禱請遷主朝享爲月朔朝廟烈文助祭卽是朝享之祭非此禘祫也○白虎通云位尊德盛所及彌遠謂之禘禘之爲言諦也序昭穆諦父子也○傳咸奏云禘者諦也審昭穆故也○禮記曰夏祭曰禘禘者陽之盛也古者

于禘祭賜服順陰陽之義也○禮外傳曰禘祫謂之
殷祭祫大而禘小春秋之經有禘而無祫毀廟無時
祭但五年有二殷祭耳神主入廟先爲一禘明年春
禘而又祫○又曰禘祫及近廟者以能世世繼君之
體持其統由親及遠不忘先祖也○摯虞決疑要注
曰豐于四時之祭而約于祫禘之祭禘以孟夏祫以
孟秋

魯郊禘

春秋意林曰魯之有天子禮樂乃周之末王賜之非
成王也魯惠公嘗使宰讓請郊廟之禮于天子天子

使史角往惠公止之其後在魯實始爲墨翟之學使
成王之世魯已郊矣則惠公奚請惠公之請也殆由
平王以下乎按魯頌闕宮乃命魯公俾侯于東錫之
山川土田附庸是言成王命魯公爵土耳其周公之
孫莊公之子以下則詩人稱美僖公郊祀之事初非
見出于成王之所命也漢儒讀詩不得其義乃妄造
明堂位之說謂成王以周公有大勲勞命魯公世世
祀周公天子禮樂是以魯君孟春祀帝于郊配以后
稷程子謂周公之功固大矣皆臣子之分所當爲成
王之賜伯禽之受皆非也張子亦謂成王不敢臣周

公故以二王之后待魯而命以禮樂特伯禽不當受以今考之蓋不然昔成王命君陳以保釐東郊而奉拳戒以遵周公之彝訓及命伯禽豈先自廢周公之釐訓哉且周公制禮以教萬世而身沒之後成王卽壞其法導人臣以僭用天子禮樂其何以令于天下藉使以重禮報周公則但當行之于周公之廟而郊以祀天大雪以祀上帝者于報周公無預則亦何以兼舉而併賜之按左傳隱公九年考仲子之宮將萬焉公問羽數于衆仲對曰天子用八諸侯用六大夫用四士用二公從之于是初獻六羽若魯之先公素

言終矣
用八佾則其羽數隱公自當知之又何以問于衆仲
春秋書初獻云者見周室既衰禮壞樂崩而至此始
能用六佾之舞但不當用于仲子之宮以開僭之源
其後歷世諸侯僭天子大夫僭諸侯其原蓋出于此
故春秋于桓五年書曰大雩見大雩之僭始于桓閔
二年書曰禘于莊公見禘之僭始于閔僖三十一年
書曰四卜郊見郊之僭始于僖自伯禽而下凡十八
世皆未有郊祀樂歌而獨自僖始則僖以前未有郊
祀之事而始僭于僖者亦可知矣自是之後魯之郊
禘率用天子禮樂其流之弊遂使季氏僭八佾三家

歌雍徹而周公之禮蕩然矣漢儒不達魯頌春秋之義而妄衍其說以誣聖經惑亂後學千載之下不知其非而反信之何哉孔子曰魯之郊禘非禮也周公其衰矣是但非魯而不非成王也以武王之聖作大武之樂孔子猶曰武盡美矣未盡善也使魯郊禘果出于成王之賜則壞禮敗度莫此爲甚孔子安得不非之而但非魯哉或謂魯惠公請郊天子命史角往自是魯始用天子禮樂苟如是惠公旣用八佾之舞而隱公降用六佾則是隱公知諸侯不可僭天子之禮又何乃以仲子而僭夫人之禮哉其說非是

魯僭禮樂

謂魯用天子禮樂其說皆非也夫周至成王而後制
禮作樂教典始以大明人皆知名分所在皆周公之
力豈有周公方薨成王遽以天子之禮樂賜魯始壞
周公之禮典乎苟如是則周公謚當何稱葬用何禮
必王而後可也廟謚曰公葬禮亦公天子禮樂何用
哉故成王非庸君伯禽非妄人必不爲此悖禮亂常
之事以啓後世僭擬禍亂之門也或疑其非成王時
是矣然謂之平王賜惠公亦豈然哉彼其意以謂治
朝賢主則禮典不紊衰主孱君則賞賜濫行故疑在

平王之世獨不思周轍雖東魯在當時不過爲次國
大國有齊楚晉宋敵國有鄭衛陳蔡使平王欲以私
意曲賜加魯鄭衛陳蔡豈得無賜齊楚晉宋肯默然
而已乎彼肯以爲上世無功德乎以晉文之霸襄王
藉其功而反正其請隧則曰王章也未有代德而有
二王亦叔父之所惡也惠公于周平亦何有哉可知
其說亦妄意也二說旣不可然則孰賜之曰未嘗賜
之也其何以然曰魯自爲之也曰何以知之據經而
知之也夫子曰天下有道禮樂征伐自天子出天下
無道禮樂征伐自諸侯出自諸侯出蓋十世希不失

矣此聖人傷衰周之亂作春秋之本旨也太惟名分
一正禮樂征伐不出于天子故諸侯僭擬相仍冠
履何上無所不至隱公六年書曰初獻六羽言于是
始僭樂而踰諸侯之制也又春秋五十有三年始書
禘八十有六年始書郊以見僭禮樂之有漸也其後
乃乘大輅載弧韜設兩觀舞八佾並用天子禮樂其
勢至此耳豈惟魯哉晉作六軍僭天子之軍也晉人
曰以寡君之未禘祀僭天子之禮也甚者吳楚直僭
稱王無所顧忌春秋魯史也書一魯如此以見諸侯
皆然先儒不究事意直以魯之所行爲他國之所無

故有成王平王賜之之說以魯爲受賜則晉之六軍
禘祀亦賜之耶吳楚僭號亦賜之耶觀此決知二說
之非而魯自爲之也然說者往往據詩魯頌曰龍旂
承祀六轡耳耳春秋匪懈享祀不忒皇皇后帝皇祖
后稷以魯爲合用盛禮也不知魯人安于僭擅非禮
猥稱其君之功德惟恐不至若果魯之常禮何獨以
頌僖公平春秋書公子遂如楚乞師則僖公之畏楚
甚矣而頌乃謂荆楚是懲春秋書公會齊侯等于淮
以見僖公服楚之役而頌乃謂淮夷卒獲以叔段之
凶惡不弟而詩人稱其洵美且仁文姜之淫恣逆亂

而詩人稱其德音不忘其可信乎故史克之頌魯亦如曲沃人徒知有樂盈而不知有晉趙人徒知有張敖而不知有漢懷其私恩而忘其大義也魯之不朝不貢無請于周久矣而謂史克請如周而作頌可知序詩者之妄也故于序則以祀后帝后稷爲盛于春秋則以行郊禘爲僭聖人刪詩存魯頌而不削者亦如存叔段文姜之詩使後世自見其非矣非謂其言之公當也

其

周禮太宰以九貢致邦國之用一祀貢二嬪貢三器

貢四幣貢五材貢六貨貢七服貢八旂貢九物貢太
府凡邦國之貢以待弔用內府掌受九貢之貨賄良
兵良器以待邦之大用大司徒諸公之地食者半侯
伯之地食者三之一子男之地食者四之一土均以
均地貢大司馬施貢分職以任邦國大行人侯服貢
祀物甸服貢嬪物男服貢器物采服貢服物衛服貢
材物要服貢貨物蕃國各以所貴實爲摯小行人令
諸侯春入貢秋獻功○禮器云大饗其王事與三牲
魚腊四海九州之美味也籩豆之薦四時之和氣也
內金示和也束帛加璧尊德也龜爲前列先知也金

次之見情也丹漆絲纊竹箭與衆共財也其餘無常
貨各以其國之所有則致遠物也郊特牲云旅幣無
方所以別土地之宜節遠近之期也虎豹之皮示服
猛也○蘇氏曰其珙通合珙之玉○韻會注珙璧也
通作拱老子拱璧

享

周書伊尹爲四方令曰臣請正東符婁仇州伊慮漚
溪九夷十蠻越漚鬻文身請今以魚支之鞞音之
鰲鮫厥利劍爲獻正南甌鄧桂國損子產里百濮九
菌請今以珠璣璫琄象齒文犀翠羽菌鶴短狗爲獻

正西崑崙狗國鬼親枳已闢耳貫宵雕題離丘漆齒
請令以丹青白旄紕罽江歷龍角神龜爲獻正北空
同大夏莎車姑他旦略貌胡戎翟匈奴樓煩月氏娥
犁其龍東胡請令以橐駝白玉野馬駒駼駃騠良弓
爲獻湯曰善

王

箋云世見曰王○大行人云九州之外謂之蕃國世
一見各以其所貴寶爲贄注云九州之外夷服鎮服
蕃服也無朝貢之歲父死子立及嗣王卽位乃一來
耳各以貴寶爲摯若大戎獻白狼白鹿是也○明堂

位云四塞世告至○周語云荒服者王終王注云朝
嗣王及卽位而來見